

ኤያ ቤሮን ይንዛራን ይዳ ክፓሻዶኖ

ግርቆስ 5

1. ኬ ኛፓስንም ሳጋንቴ ጌርሴኖን ሃንዳን ፔንዛራ ናእዲና።
2. የሱስ ጋግንባራኻ ክሳ ሃንቻ፤ ይሪካ ኤያ ኡሲን ዛርቦን ይንዛራ ይዳ ዱክን ራቅንባራ ወታንቴ ክላማ ኬሮታ ክዛራ ናእዲና።
3. ኤያ አጋኻም ዴንታኖ ክሳ ዱክን ራቅሮጎና፤ ኤዲ ካላካም ኪም ሰንሳሌትንካ ዳኻናንቴ ቻላዳ ቆልማም።
4. ሮሮ ውል ዛውንካቤ ሰንሳሌትንቤኻና ዳክቴ ዳዳዶ፤ ኮዶንካም ሰንሳሌትን ይሳ አኒሮኻ ታሽካና ክያያይ፤ ዛውንምካም ይሳ ራሮኻ ቁንፃና ክያያይ። ኤዲ ካላኻም ኪም ባሻያ ቆልማም።
5. ዱክንቤ ጌማራቤ ግዶር ሮሮንቤ ሶቲንቤ ያይቴ እላትቴ፤ ሱኒንካካም ቢሽን ይሳም ቦኻና ክያያይ።
6. ኤያ አጋ የሱስም አኻራ ፔጌ ሃፓንቴ፤ ጎባኻ ናዴ ክሳ ዎትሮጎ ኮምፓርሳንቴ ክናንቴ ጉንሢምዲና።
7. ናቅሲ ይሳም ዴግ ሃያንቴ እላታንቴ፤ “ያ ባሪያ ጌጳ ናሳ የሱስ፤ እካላ ሃሳ ዶኖ ሃርቴ? ኢም ጋሊንሻን ሃጋራኻናንቴ ባሪያ ናብንካ እንታ ሃም ምስክዲና ና!” ክግያ ክያማዶ።
8. ኖ አንታ ይናንቴን ክያማዶኖ፤ የሱስ ክግያ “ያ ኡሳ ዛርባ፤ ኤያ ካ ባራንካ ወትማ” ክያማዶንታኻና።
9. ሃያንቴ የሱስ ክግያ፤ “ናብኖ ሃሳ ሃውቴ?” ሃማንቴና ክካላ ክአይሳዶ። ኖ ክግያ “ዎቲይ ዱፅና፤ ናብኖ እሳ ሌጌዎኒና” ክያማዶ።
10. ፔን አጎሮኻ ኬም ቡላን ክጋራኻናንቴ ኖ ኪም ጌጲ ምስክዲና።
11. ኬሳ ዴምሮ ጉርባስ ዳ ግዶር ጉቴም ጲፅ ዴዲቴና ኬዶ።
12. ኡሲና ዛርቦና የሱስ ግያ፤ “ዎም ጉቴምናዛራ ይእስማ፤ ኬዛራ ዎአርዴኻናንቴ ናሽማ” ሃማንቴ ኪም ኬ ምስክዲና።
13. ኖኻም ናሺዲና፤ ኡሲና ዛርቦናኻም ወታንቴ ቃልቴ ጉቴምናዛራ አርድዲና፤ ጉቴምናኻም ሺህ ላማግያምናኻም ዴሎንዛራ ሙጉማንቴ ምጫ ቦዳንካ ኛፓስንዛራ ካይማንቴ ፀውዲና።
14. ግሽምን ኤና ጎብቴ ያእድና፤ የራ ሃማዳናም ካታማንቤ ራቅና ካታማ ትምናቤዛራ ሻምሺዲና፤ ዛርባኖ የራ ሃማዳናም ሽዳናንቴ ራቅና ይዳና ባራንካ ውቲዲና።
15. የሱስዛራካም ኬንና ኤያ ቤሮና ይንግያን ሌጌዎን ሃንዳይና ይንዛራን ይዳ አፓላ አርሳንቴ ጫቴ ክሳ ኮማቲሻ አጎታር ዳርቃንቴ ክዳኻ ኬያፓንቴ ኩርትንዲዲና።
16. ኤና የራ ሃማዳናም ሃፓዳና ኤያ ቤሮና ይንዛራ ይዳዛራ የራ ሃይዳዳናቤ፤ ጉቴምናቤዛራ የራ ሃይዳዳናም ዛርባንናንቴ ጌይዲና።
17. ሃያንቴ ዛርባኖ የሱስ ፔን ኬሳም ጋራንቴ ክዩኤኻናንቴ ኪም ምስካን ካርሲዲና።
18. የሱስ ጋግንዛራ ክያንቻን ዋዳንካ ኤያ ቤሮና ይንዛራን ይዳ ክላማ ያአናንቴ ኪም ምስክዲና።
19. የሱስ ክላማ ክዩኤኻናንቴ ዛጋዲማም፤ ኮዶንካም ክግያ “ሃሳ አኖንዛራ ይማ፤ ጌጳ የር ሃማግያማ ጌጲ ሃናንቴ ክያያዶንቤ፤ ሃማግያ ሃናንቴ ክቡርቃዳዶንቤም ሃሳ ኤዳናናንቴ ጌይማና” ክያማዶ።
20. ኤያኻም ያእዲና፤ የሱስሳ የራ ክናንቴ ሃይዳዳናም ፓይላ ካታማና ታጲና ሃንዳይና ፔያስ ግዶር ጌያን ካርሲዲና፤ ኤና ኤሳርዳና ፓይላ የርሺዲና።

21. ፕሮካሞ የሱስ ጋግንካ ሳባራ ክሳጋና፤ ኤዲ ጳጳስ ክካላ ፑጭዲና፤ ኖ ሻፓስንሣ ባይን አፖሮ ክዳኝ፤
22. አይሁድናሳ ምስኮን ኦኖንሣ ኤና ጋርና ግድር ካላ ኢያኢሮስ ሃንዳያ ኦጎታር ናዴ ዳይዲና፤ የሱስም ይያፓና ክሳ ራሮጎ ጳርግንቴ፤
23. “ናኖ እሳ ሾሊኖ ዴምጲንሣ አፖሮና ኮዶ፤ ፓሻንቴ ሳዳንካ ኮዴኻናንቴ ናዴ አኒ ሃሳም ኮዛራ ዎድማ” ሃማንቴ ኪም ጌጲ ምስክዲና።
24. የሱስካሞ ክላማ ክንካ ያእዲና። ዛርስኖ ዱፅኖኻሞ ኪም ጭጃዳቴ ጫግዲና።
25. ኦጎታርካሞ ጫ ኻላ ቦን ታጲ ላማናንቴ ማአስን ይንቅስቴን ዶኖ ዳይዲና።
26. ኤና ዴሻን ይንካላን ይዳና ካላ ቃልቴ ጋሊቴ ኮይና ይሳ ዳናም ኮቱንሣዶንካሞ ሃጂሞኖ ኮሳ ካልሎንና ኮሻብማዶ፤ ካላኻሞ ፓሻድማሞ።
27. ኮዶን ና የሱስሳ ዴላቅ ይኤሳራና፤ ክሳ ራስባራ ናዴ ኤዲንሳ ባክሮ ክሳ አፓላን ላአሲዲና፤
28. አጋምካሞ ይንናንቴ ኸሃያዶኖ “ክሳ አፓላንም ዳናኻሞ እላአስና ፓሻና እፓሻይ” ሃማያ ቃቦና ኮሳ ዶኖ።
29. ማአስኖ ኮሳ ይንቅማይኖ አጋዛራ ዎይዲና፤ ይሳ ጋሎንባራኻ ኮውታዶኖ ኮሳ ብሽሮ ኮናንቴ ዴስምዲና።
30. አጋዛራ የሱስ ክሳ ብሽሮኻ ካንታኖ ኮውታዶንም ዴሳንቴ ዛርስንዛራ ሽራንቴ፤ “ኤያ አፓላን እሳም ላአሳዳ ሃውቴና?” ክያማዶ።
31. ታማርና ክሳካሞ ክግያ፤ “ዛርስኖ ጭጂማንቴ ሃም ኮይቃን ሃፓ ሃፓ ‘ኤያ ኢም ላአሳዳ ሃውቴ?’ ሃስ ሃያሜና?” ኪያማዶ።
32. ኮዶን የሱስ ኤያ ኦጎንታ ሃያዳ ሃው ክዶንም ሃፓናንቴ፤ ዴሞን ይሳም ፓይላ ሼድዲና።
33. ኤስኖ ኮናንቴ የራ ሃይዳዳም ይጴሳና፤ ኩርቲንዳንቴ ግባዛዳቴ ናዴ ክሳ ዎቲሮጎ ዳርጊዲና፤ የራ ጎንዴናምካሞ ፓይላ ክናንቴ ጌይዲና።
34. ኖኻሞ ኮግያ፤ “ናኖ እሳ፤ እምናትኖ ሃሳ ሃም ዳአሽዲና፤ ፃሊንካ ይማ፤ ጋሎን ሃሳባራኻሞ ኡኩንሥማና” ክያማዶ።
35. የሱስካሞ አኻራ ሃሳውቴ ክዳኝ፤ ኤዲኖ አይሁድናሳ ምስኮን ኦኖንሣ ኤያ ጋራ ኢያኢሮስ ኦኖንባራ ናዴ፤ “ናኖ ሃሳ ጃይዲና፤ ታ ናንሣ አስታማራም ሃርናንቴ ሃጋሊንሼና?” ክግያ ኪያማዶ።
36. ኮዶን የሱስ የርን ኤና ይጌያዶኒም የርዛራ ፓይድማ፤ ኤያ አይሁድናሳ ምስኮን ኦኖንሣ ጋራግያ፤ “ያ ሃኩርቲንዲናኖ፤ አምንዳን ሶጎ አምንማ” ክግያ ሃምዲና።
37. ጴጥሮስቤ ያዕቆብቤ ያዕቆብ እንዳን ናሳ የሞንስቤሳ አባራ ኤዲ አብ ኪም ኮጫጌኻናንቴ ዛጋድማሞ።
38. ኤያ አይሁድናሳ ምስኮን ኦኖንሣ ጋራ ኦኖን ኪንና፤ የሱስ ኤናሳ ዋርዋር ሃንዳንቤ ሃይኤ ሃይኤ ሃንቴ ኤፓዳንቤም ሼድዲና።
39. ኤኖንዛራ አርዳንቴ ኪግያ፤ “ኮኖ ፓይላ ዋርዋር ሃንዳንቤ ኤፒንቤ ሃርቴ? ናኖ ራቲሪና ኮዶ፤ ጃድማሞና” ክያማዶ።
40. ኮዶን ኤና ክዛራ ሃንጭዲና። ኖ ኤናም ፓይላ ኦኖንባራ ቡልሳንቴ ራስባራ፤ ናንሣ እንባቤ እንዳንቤ ሃያንቴኻሞ ታማርና ክላማን ናአዳናም ጫግሻንቴ ናንሳ ይግዶር ዳዳዶንዛራ አርድዲና።
41. ሃያንቴ ናንሳ አኒም የዳንቴ፤ “ጣሊታ ቁሚ” አጋኻሞ ኮሳ ሃንዲዲ “ያ ናኖ ኮኖ፤ ሃግያ ዳጳንቴ ዎይማና እያማይና” ሃንዳዶ።
42. ናኖ አጋዛራ ዳጳንቴ ዎይዲና፤ እሲቤ ኦራቤ ያይዲና። ናንሣ ቦንናኻሞ ታጲ ላማና። ኤናኻሞ የራ ሃማዳም ጌጲ የርሺዲና።
43. ኖኻሞ የራ ኻም ኤዲ ካላኻሞ ዴሳን ኮጋሪ ሃማንቴ ኪም ጌጲ ኪሊዲና፤ የር እሣዳያኻሞ ኮናንቴ ኪእሜኻናንቴ ጌይዲና።

ኤዲ ባሪያሳ አፖን ጌያም ፔን ክኖሮ ጎባዲማሞ

ማርቆስ 6

1. አጋሳኸሞ ራስባራ የሱስ አጎታርካ ዳጳንቴ ፔን ይሳዛራ ያእዲና፤ ታማርና ክሳካሞ ኪም ጫግዲና።
2. ኡኩንሳን ሮራ ክዩስካና አይሁድናሳ ምስኮን ኦኖሮ ታማርሳን ካርስዲና፤ ኤና ኤሳርዳና ዱፀና የርሺዲና። ኬ ይንታና ኬያማዶ፤ “ኤያ ኸ የራ ክናም ሃንታርካ ክያፓዴ? ኮኖ ሃማሞኖ ክናንቴ እንዳዶኖ ሃርቴ? ሃያንቴኸሞ የራ ሃሚማን ግያንዳና ክና ሃስ ክሳ አኒንካ ኬአሽክሜ!
3. ካ ኤያ ኦኖን አሽካያሞ? ማርያም ናሳ፤ ያዕቆብቤ፤ ዮሴስቤ፤ ይሁዳቤ፤ ስምኦንቤ እንዳ ናሳሞ? እንዳን ናና አንዛና ኮታ ዎላማሞ ኬዶኖ?” አጋኸ ሃማንቴ ኬ አምንማ ሺዲዲና።
4. የሱስካሞ ኬግያ፤ “ኤዲ ባሪያሳ አፖን ጌያም ጎባዲሞኖ ፔን ይኖሮቤ፤ ይሳ ኤዳናቤ ይሳ ሞሮን ኤና ይናቤኸ ሶጎና” ክያማዶ።
5. አጎታር ኤዲ ሃጂሞ ቶኸዛራ አን ይሳም ዎዳንቴ ፓሽሻንቴ እግናሳ ኦባራ ካላኸሞ የር ሃሚማን ግያንዳ ሃያናንቴ ቻልዲማሞ፤
6. ኬአማንድማኸ ሃማንቴ የርሺዲና። ሃያንቴ የሱስ ሞሮና ግዶር ያያንቴ ታማርስቴና ክዶ።

የሱስ ታማርና ታጲ ላማናም ይእስዲና

7. ሃያንቴ ታማርና ይሳ ታጲ ላማናም ይዛራ ግስማንቴ፤ ኡስና ዛርቦናዛራ ኬናንቴ ጌጳም እማንቴ፤ ኬም ላማ ላማ ሃያንቴ ይእስዲና።
8. ኬናንቴ ኤልቅማና ክናምካሞ ጌይዲና፡- “የሳ ጎይንናንቴ ሴጋሳ ኦባራ ዳኦኖ ዎይካሞ ሶርቢ ዎይካሞ ብሬ የሳ ጎርጳንግ ኢሮጎ ዎዳንቴ የባኦናኖ፤
9. ዱኸር አርስማቴ፤ ኮዶን ቸባራ አፓላ ላማ የአርሲናኖ።
10. ኦኖ ካላዛራ የአርዲና ካታማስ አጋሮኸ የሳ ዉታዛራ አጋሮ ካፕማቴ፤
11. ራቅ ሃንታርካሞ ዩም ኬቻድምናቤ ዎይካሞ የናንቴ ኬኤሳርድምና ራቅን ኦጎሮኸ የዉትና ኬናንቴ ማኚ ኮይኸናንቴ የሳ ራንዛራ ቡቡና ዳናም አጎታር ዱርዱርማቴ።”
12. አጋታኸ ኬ አጎታርካ ዉታንቴ ኤና ዳቆን ጎይንዛራ ኬኔኤኸናንቴ ባሪያሳ ዴላቅንም ጌይዲና።
13. ቤሮ ዱፀካሞ ኬ ቡልዲና፤ ኤዲ ሃጂሞ ዱፀዛራ ዛይቲን ቃዳንቴ ፓሽሻዲና።

ኑንቆንካ ሻያያ የዋንስሳ ዛጋራን ቱንዳዶኖ

14. የሱስሳ ናብኖ ዴስማዳቴ ኮናአዶን ኦጎም ብታ ሄሮዶስ ኤሳርዲና። ኤዲኖ ዋኒካሞ “ኑንቆንካ ሻያያ የዋንስ ዴምጲንባራ ክዳጳዶንታኸ የራ ሃሚማን ግያንዳና እግና ክሳ አኒሮ ሃማና ኮያማይና” ሃምቴ ኬዶ።
15. ኤና ዋኒካሞ “ኖ ኤልያሲና” ኬያማይ። ኤና ዋኒካሞ “ኦና ኤና ባሪያሳ አፖን ጌያይና ግያ፤ ባሪያሳ አፖን ጌያይና ግዶር ኖ ዋና” ሃምቴ ኬዶ።
16. ኮዶን ሄሮዶስ የራም ይኤሳራና፤ “እንታ ይንግ ዛጋራን እቱምግዳ የዋንስ ዴምጲንባራ ዳጲዲናና” ክያማዶ።
17. ኖ ሄሮዶስ እንዳ ናሳ ፈልጶስ ሜን ሄሮድያዳም ይኬማዶን ጎይንካ ሃማንቴ የዋንስም የዲሳንቴ ዳኸዴኸናንቴ ዳክን ኦኖን አርስሳንቴና ክዶ።
18. ኖ አጋንታ ክሃያዶኖ የዋንስ ክግያ፤ “ሃንና ናሳ ሜንም ሃኬሜኸናንቴ ዳንብኖ ጌይማሞ” ሃማንቴ ክጌያዶንታኸና።
19. ሄሮድያዳ የራ አጋኸ ክዛራ ቁፓሞ የዳንቴ ኪም ዴስሳናንቴዛግዲና፤ ኮዶንካሞ ኮናንቴ አጋድማሞ፤

20. አጋኝም የዋንስ ኤዲ ጋዛቤ ኤዲ ጫራጂቤ ክዶን ሄሮዶስ ይደሳደንታኝ ኪም ኩርቲንዳቴ ኪም ማንክቴና ክዶ። የዋንስሳ የራ ጌይዳይናም ሄሮዶስ ይኤሳርና ሃኪማና ክያክማይ፤ ኮዶን ና ኪም ዋዛኝና ክኤሳራይ።
21. ቱንሥሮ ዋዳ ፃል ናእዲና። ሄሮዶስም አዳዳዳ ሮራጋላ ኤና ፔንሣ ጋርናቤ፤ ኤና ዎታዳርናሳ ጋርናቤ ገሊላ ፔሮ ኤና ጌዲና ደስድናቤም ና ዲግሲዲና።
22. ሄሮድያዳ ናኖ አርዳንቴ ዋርሳ ዳሳቴ ሄሮዶስቤ ኤና ክድግሳዳናቤም ዋዚንሢዲና። ብታኝም ናንግያ “የራ ሃዛጋይናም ፓይላ እካላ አይስማ፤ ሃናንቴ እማና ኢማይና” ክያማይ።
23. ሃያንቴኝም “እሳ ማንግትንሳ ባኝላም ዳናኝም እካላ ሃአይሳይና የራም ፓይላ ሃናንቴ እማና ኢማይ” ሃማንቴ ኮናንቴ አሽንሻንቴ ጌይዲና።
24. ናኝም ዉታን ቃልቴ እንዳንግያ፤ “ክካላ ሃር እምስኪና?” ኮያማይ። እንዳኖኝም ኮግያ፤ “ኑንቆንካ ሻያያ የዋንስሳ ሜቴንም ምስክማና” ኮያማይ።
25. ናኖኝም አጋዛራ ይሪካ ማታቴ ቃልቴ ብታግያ፤ “ኑንቆንካ ሻያያ የዋንስሳ ሜቴንም ታ ሻርቃዛራ ሃያንቴ እናንቴ ሃእሜኝናንቴ ዛጋና እዛጋይና” ኮያማይ።
26. ብታ የራኝ እልል ጃይዲና፤ ኮዶን ኤና ይድግሳዳናሳ ዎትሮ የራ ናን ናንቴ አሽንሻንቴ ይጌያዳም ጋራናንቴ ዛጋድማም።
27. አጋታኝ ዎታዳርናሳ ካላም የዋንስሳ ሜቴንም ቱማንቴ ይሪካ ክቤኤኝናንቴ ይእስዲና፤ ዎታደራኝም ዳክን አኖን ቃልቴ የዋንስሳ ሜቴን ቱምዲና፤
28. ሻርቃኝኝም ባአቴ ናዴ ናንናንቴ እምዲና፤ ናኖኝም ቃልቴ እንዳንናንቴ እምዲና።
29. የዋንስሳ ታማርና እግናም ኤሳራንቴ ናእዲና፤ ኪምካም ቻንቴ ኬ ዱክዲና።

የሱስ ኤና ሺህ ዶንሻናም እሥንሢዲና

30. የሱስ ኤና ይንናቴ ጌዳምን እማንቴ ሂይእሳዳና ክካላ ፑጫንቴ የራ ይአሽካዳናቤ ይታማርሳዳናቤም ክናንቴ ጌይዲና።
31. ኤዲ ጴፀ ናአ ያአ ሃይቴ ኮዶንታኝ፤ ዳአኖኝም እሣናንቴ ኬ ዋዳ ይያፓድሞንታኝ፤ ና ኪግያ “ይንዳ የቲህ ሶጎ እላማ ክንካ ኤዲ ይቆልማ ራቅ ካላዛራ ቃልቴ፤ አጎታር ሾሊ ኡኩንስማቴና” ክያማይ።
32. ሃያንቴ ኬሶጎ ይዳር ኤዲ ይቆልማ ራቅ ካላዛራ ጋግንካ ያእድና።
33. ኬኝም ይቴ ኬዳኝ ኤዲኖ ጴፀኖ ኬም ሃፓንቴ ደስዲና፤ ካታማና ግዶርካ ፓይላ ዉታንቴ ጎባኝ ኬም ብራንቴ የስክዲና።
34. የሱስ ጋግንባራ ክውታዶን ዋዳንካ ዛርስኖ ፑጫንቴ ኮዲኝ ሃፒዲና፤ እያት ይንሳ ግሽም ኤዲ ቆልማግያ ኬዶኖ፤ አጎኖ ክሳ ላፖ ደስዲና፤ የር ጴፀካም ኬም ታማርሳን ካርስዲና።
35. ዋዳን አጎኝ ሃኖኖ እባናዳቴ ይቴ ኮዶንታኝ፤ ታማርና ክሳ ክካላ ናዴ ክግያ፤ “ራቃ ኝ ዳራና፤ ፔኖኝም እባንዲና፤
36. ኤና ይዳና ራቅናዛራ ቃልቴ የር እሣዳያ ሻናንቴ ኬእሢኝናንቴ ዛርስንም ይእስማና” ኬያማይ።
37. ኮዶን ና ማሳንቴ ኬግያ፤ “ኬእሣይንም የቲህ ኬናንቴ እማቴና” ክያማይ። ኬኝም “ቃልቴ ዲናር ማቶ ላማኝ ባላሻ ሻናንቴ ኬእሢኝ ዎእሜዬውና?” ክግያ ኬያማይ።
38. ና ኬግያ “ባላሻ ሜሚቴ ዳና? ይንዳ ቃልቴ ሼድማቴና” ክያማይ። ኬ ሼዳንቴኝም “ባላሻ ዶንሻቤ ካራ ላማቤና ዳና ና” ኬያማይ።
39. ሃያንቴ ና ዛርስንም ሾቆን ጫግሮ አልላ አልላኝ ሃያንቴ ኬዳአርቤኝናንቴ ኬናንቴ ጌይዲና።
40. ዛርስኖ ክዛራ ማቶ ማቶቤ ዶንሻታም ዶንሻታምቤ አልላ አልላኝ ማታንቴ ዳርቅዲና።

- 41. ፍኸም ባላሻና ዶቫናቤ ካራና ላማናቤም ዳኦሳንቴ ፖላንዛራ ሼዳንቴ ዳክምዲና፤ ባላሻናም ቁንፃንቴ ኤና ናንቴ ኬእሜኸናንቴ ይሳ ታማርና ናንቴ እምዲና፤ ካራና ላማናምካም ኤና ውልናንቴ ካሽዲና።
- 42. ኤና ፓይላ ውልካም እሣንቴ ምሽዲና።
- 43. ታማርና ክሳካም ባላሻናቤ ካራናቤሳ ኤና ኬእሢኸ ሽዳዶንም ሻርቃ ታጲ ላማ ፑእሽዲና።
- 44. ኤና አንጌና ባላሻን እሢዳና ሺህ ዶንኺና።

የሱስ ኛፓስንዛራ ያይዲና

- 45. አጋዛራ ፍ ዛርስንም ይእሲቴ ዳኦንቴ ክሳ ታማርና ኪም ብራንቴ ቤቴ ሳይዳዛራ ኬሳጌኸናንቴ ጌይዲና።
- 46. ሃያንቴ ኬም ጋራንቴ ምስካናንቴ ጌማርዛራ ወቲዲና።
- 47. ኮእባናንካም ጋግኖ ኛፓስንሣ ግዶሮና ኮዶ፤ ፍ ይዳር ጳልሎና ክዶ።
- 48. ግባሮኖ ኬዛራ ኮዋቻዳዶንታኸ፤ ታማርና ይባይንላማ ክንካ ኬማይሽምካ ፍ ሃፕዲና፤ ፔንሣካም ሶፅም አፖ ግዶር ፍ ኛፓስንዛራ ደግ ያያዳቴ ኬዛራ ናእዲና፤ ኬሳ ዴሞኸ ሳጋንቴ ያኦናንቴኸም ሃይዲና፤
- 49. ኮዶንካም ኛፓስንዛራ ኪይካ ኪም ይያፓና ቤሮ ማይሻንቴ ኬ እላቲዲና፤
- 50. አጋኸም ኬ ፓይላ ውል ኪም ይያፓና ቴርጋዲዲና። ፍ አጋዛራ ኬም ደላቅሳንቴ “ሃይ! የኩርቲንዲናኖ! እንታና” ኬግያ ሃምዲና።
- 51. ፍ ጋግንዛራ ሃንቻንቴ ኬላማ ክንካ ዳርቅዲና፤ ግባሮኖኸም ዎይዲና፤ ኬኸም ካልሎን የርሺዲና፤
- 52. አጋኸም ባላሻንዛራ የራ ሃሚማን ግያንዳ ሃማዳም ኬ ጳቅስማና ኬዶ፤ ዎይላምኖ ኬሳኸም ካያምና ኮዶ።
- 53. ኬ ይሳጋና ጌንሳሬጥ የስካንቴ ኦጎታር ሃንቹዲና፤ ጋግንካም ኦጎታር ኡክዲና።
- 54. አጋዛራ ጋግንባራ ኬሳ ሃንቻ፤ ዛርስኖ የሱስም ኬንሻቴ፤
- 55. አጋዛራ ኬ ሞሮናዛራ ጎባንቴ ኤና ሃጂሞናም ሻላንካ ባኦንቴ ክዶንዛራ ንቴና ኬዶ።
- 56. ፍ ክያአይና ሞሮናቤ ካታማናቤ ራቅና ካታማን ትምና ውልቤ ግዶር ኤና ሃጂሞናም ጳልሎ ዎዳዳኸ ክሳ አፖላንሣ ኑኪም ላኦሳናንቴ ምስክቴና ኬዶ፤ ኤና ላኦሳይናኸም ፓይላ ፓሽቴና ኬዶ።

የሱስ አይሁድናሳ ዳምብን ቶዛዲዲና

ማርቆስ 7

- 1. አጋሳ ራስባራ ፋራሳዊይናቤ የሩሳሌምባራ ናኦዳና ኤና ዋኒ ሙሴ ዳምብን ኡካይና ክካላ ፑጭዲና፤
- 2. ክሳ ታማርና ግዶር ዋኒ አኒን ጫንቃልን ትሞንካ አጋኸም አኒን ሻይዳድሞንካ ኬእሥምካና ኬያፓዶ፤
- 3. ኦጎኖኸም ፋራሳዊይናቤ አይሁድናቤ ፓይላ እንባናሳ ዳምብንም ማንካናንቴ ዳምብን ጎይንካ አን ይሳም ጫንቃል ሻይማ እሥምማም።
- 4. ጋባንባራ ይማቲናኸም ሻዳንቴ ይም ጫንቃል ይያያዲምና እሥምማም። ሃያንቴኸም ኩልንቤ፤ ዳኦንቤ፤ ሻርቃንቤ ጴዴን ሻይዳንቤ ዳምብና ዋኒቤም ሃያና ኬሃያይ።
- 5. ፋራሳዊይናቤ ኤና ሙሴ ዳምብን ኡካይናቤ፤ “ታማርና ሃሳ ዎምባና ዳምብንካ ዳዳን ጋራንቴ አኒን ሻይዳድሞንካ ሃርናንቴ ኬእሴ?” ሃማንቴ ክካላ አይሴዲና።
- 6. ፍ ይንታ ሃማንቴና ኬናንቴ ክማሳዶ፡- “ኢሳይስ የካይስንሦን ኤናሳ ባሪያሳ አፖንም ልኪ ጌይዲና፤ አጋኸም ይንታ ሃማንቴ ዋርቃትሮ ኡካዲዲና፡- ‘ዛርስኖ ኮኖ አፖኸ ሶጎና ኢም ኮጎባይ፤ ኮዶን ዎይላምኖ ኬሳ እካላንካ ፔጌና ኮዶ።
- 7. ሱንና ኢም ኬምስካይ፤ ታማርኖ ኬሳ ኤዲ ይእማዳ ዳምብ ሶጎና።”
- 8. የቲህ ባሪያ ይጌያዶን ጋራንቴ፤ ኤዲ ዳምብንዛራና የዋቻዳይ።”

9. ፕሮክሎኖች የ ይንታና ኬግያ ክያማዶ:- “ዳምብን የናንም አሽካናንቱ ባሪያ ይጌያዶንም ይንካ የጋራያ ጎይ ዳይዲና ና” ክያማዶ።
10. ሙሴ ሃምባቤ ሃንናቤም ጎብማ፤ ናሳ እንባም ወይካም እንዳንም ኢራያ ክጄ’ ሃማንቱ ጌይዲና፤
11. ኮዶን የቲህ ኤዲ ካላ እምባ ወይካም እንዳንም ‘የራ እካላ ኬያፓን ግያንዳና ኬልሾናም ፓይላ እንታ ባሪያ ናንቱ እምዲና’ ኬግያ ክያምና፤
12. የቲህ ኤያ አጋ እምባናንቱ ወይካም እንዳንናንቱ ቤራሌሚ የር ካላ ክያዮኻናንቱ የቲህ ናሽማም።
13. አጋታኻ ቢዛን ናኦናንቱ ዶንናንቱ ዳምብናም የስክሳናንቱ ባሪያሳ ዴላቅንም ሺእሻና የሺእሻይ፤ የራ እግና ግያምናም ዲፅ ሃይቱና ዮዶ!”
14. ሃያንቱ የሱስ ዛርስንም ይዛራ ግስማንቱ ይንታና ክያማዶ:- “የቲህ ፓይላ ውል ኢም ኤሳርማቱ፤ ሃያንቱኻም ዲቅስማቱ፤
15. ዳልሎኻ ኤዲሳ ኢዛራ አርዳንቱ ኤዲም ሴሳያ የር ካላኻም ቆልማም፤ ይያማንካም ኤዲ ናሶም ሴሳያ ክሳ ኢንባራ ዳልንዛራ የራ ወታያና፤
16. ኤያ ቃምን ኤሳራንካ ዳ ይዳና ክኤሳራ።”
17. ዛርስንም ጋራንቱ ኦኖንዛራ ክአርዳኻ ታማርና ክሳ ዳይንሳም ክካላ ኦይስዲና።
18. ኖኻም ኬግያ “የናንቱኻም የራ አርዳይዮው? ዳልሎኻ ኤዲሳ ኢንዛራ አርዳንቱ ኤዲም ሴሳናንቱ ቻላያ የር ካላኻም ቆልማም፤
19. አጋኻም ወይላምንዛራ ጋራንቱ ኤዲሳ ኢንዛራና ክአርዳይ፤ ሃያንቱኻም ብሽሮኻ ወታና ክወታይ።” የሱስ የራ እግናም ይጌያዳኻ ዳአንኖ ፓይላ ጫንቃል ኮዶንም ዳውዲና።
20. ጫግሻንቱኻም ኖ ይንታና ክያማዶ:- “የራ ኤዲሳ ኢንባራ ወታያ አጋ ኤዲም ሴሳና ክሴሳይ፤
21. ኤዲሳ ኢሮቤ ወይላምሮቤኻ ወታይና ቃቦ ዛርባቤ፤ ቡላምቤ፤ ዲባምቤ፤ ኤዲም ዴሳቤ፤ ኤዲሳ ሜኻ ወዲንታቤ፤
22. ዛላምቤ፤ ዛርባምቤ፤ ታይሲቤ፤ ፖሽኮቤ፤ ቁፓምቤ፤ ቆፅምቤ፤ ቃይንታቤ፤ ዴጋምቤና።
23. የራ ዛርባና ክና ፓይላ ኤዲሳ ኢባራ ወታንቱ፤ ኤዲም ሴሳና ኬሴሳይ።”

ሲሮፊኒቃ ፔን ኤስንሣ ኢምናትኖ

24. ኦጎታርካ ኖ ዳዳንቱ ፔን ጢሮስዛራ ያእዲና፤ ኦኖ ካላዛራ አርዳንቱ ኦጎታር ክዶንም ኤዲ ኮዴሴኻናንቱ ዛጋድማም፤ ይያማን ኦጎታር ኤዲናንቱ ሃፕንዳኖ ክሳ ሽዳዲማም።
25. ኮዶን ይሪካ ኤስኖ ይንሣ ናን ሾሊን ኡስን ዛርባን ይዮዳድዶኖ ካላ ኦጎታር ክዶንም ኤሳራንቱ ናዴ ክሳ ራሮ ኮምፓርሲዲና።
26. ኤስኖኻም ግሪክ ፔን ኤዲና፤ ኮም ኮሳ አዳዲዶኖ ሲሮፊኒቃ ፔሮና። ና የሱስ ቤራም ኮሳ ናን ባራኻ ክቡሌኻናንቱ ምስክዲና።
27. ኮዶን ኖ “ናናሳ ዳአኖን ቻንቱ ቃስክናናንቱ እማዳያ ጎይ ልኪ ክትሞንታኻ፤ ብራቱ ናና እሣቱ ኬምሼና” ኮግያ ክያማዶ።
28. ና ክግያ ይማሳና፤ “ጌጳ አጋ ልኪና፤ ቃስክና ሻርቃንሳ ዴምሮ ዳአንቱ ናናሳ አኒሮኻ ዲናይና ፓላምናም እሣና ኬእሣይና” ኮያማዶ።
29. ኖኻም “አጋም ሃጌያዶንታኻ፤ ይማ! ቤራ ሃሳ ናንባራ ወትዲና ና” ኮግያ ክያማዶ።
30. ና ይሳ ኦኖን ማታቱ ኮይና ናንናም ቤራ ክጋራኻ ዴዴንዛራ ወዳንቱ ኮዳኻ ሃፕዲና።

ኤያ ቃምን ካያስቤ አፖን ካያስቤም ፓሽሻዳዶኖ

31. ሃያንቱ የሱስ ጢሮስ ፔሮካ ወታንቱ ሲደናኻ ሽራንቱ ካታማና ታጲና ሃንዳይና ፔናም ሳጋንቱ ገሊላ ኛፓስዛራ ናእዲና።
32. ኦጎታር ኤና ኤዲ ካላ ቃሞንቤ አፖንቤ ካያስም ክዛራ ባአቱ ናእዲና፤ ኖ አኒ ይሳም ክዛራ ክዎዴካናንቱ ኤና ኪም ምስክዲና።
33. የሱስካሞ ኤያም ዛርስን ካላንካ እስ ሃር ቡላንቱ፤ አንና ይሳም ኤያሳ ቃሞሮ አርስዲና፤ ሃያንቱ ፓፅማንቱ ኤያሳ አታጲን ላአስዲና።
34. ፖላንዛራ ሼዳንቱ ይሳ ዎይላምንካ ኤላቃንቱ፤ “ኤፍታህና!” ክያማይ። አጋካሞ “ቡሉማ ና” ሃንዳይ።
35. አጋዛራ ቃሞኖ ክሳ ኤሳርዲና፤ አታጲኖካሞ ቡልማንቱ ልኪ ዴላቃን ካርስዲና።
36. የሱስ የራ እግናም ኤዲ ካላናንቱካሞ ጌያን ኬጋሬካናንቱ ጌይዲና፤ ይያማን ኖ የራ ጌያን ኬጋሬካናንቱ ኬናንቱ ክጌያዶን ጋራንቱ ኬ የራም ካልሎን ሻባንቱ ጌይዲና።
37. ዛርስኖ ካልሎን የርሻንቱ “የራ ክያያዳና ፓይላ ሃሊና፤ ኤና ቃሞን ካያና ኬኤሳሬካናንቱ አፖን ካያናካሞ ኬዴላቁካናንቱ ሃይዲና ና” ኬያማይ።

የሱስ ኤዲ ሺህ አይዲም እንሥንሥዲና

ማርቆስ 8

1. ዋዳን ኦጎካ ፕርካሞ ዛርሲ ጴፅ ፑጭዲና። ኖ ኬሳ ዳአኖ ኬእሣያ ካላካሞ ኮቆልሞንታካ ታማርና ይሳም ይዛራ ግስማንቱ ይንታና ክያማይ፡-
2. “እላማ ክንካ ሮሮ ማካም ኬካፓዶንታካቤ የር ኬእሣያ ኮቆልሞንታካ ኤና ክና እሳ ላፖና ኬዴሳይ፤
3. ኮንታ ዳቃዳንቱ ኬዳኻ ኬም ኬሳ አኖናዛራ እይእስና፤ ኤና ዋኒ ራቅ ፔጌባራ ኬናአዶንታካ ጎይሮ ቃጃንቱ ሽዳና ኬሽዳይ።”
4. ታማርና ክሳካሞ ማሳንቱ ክግያ፤ “ዳራን ኮሮ ኤና ክና ኬእሣያካናንቱ ባላሻ የካያ ሃንታርካ ሃፓዴ ና?” ኬያማይ።
5. ኖ ኬግያ፤ “ባላሻ ሜምቱ የሳ ዳና?” ሃማንቱ አይስዲና። ኬካሞ “ባላሻ ሦጳና ዳና” ኬያማይ።
6. ኖ ዛርስኖ ፔንዛራ ኮዳርቁካናንቱ ጌይዲና፤ ባላሻና ሦጳናም የዳንቱ ምስክንቱ ቁንፃንቱካሞ ዛርስንናንቱ ኬካሻካናንቱ ታማርና ይሳ ናንቱ እምዲና፤ ኬካሞ ዛርስንናንቱ ካሺዲና።
7. ሃያንቱካሞ ካራ ሻቃቅ ሃማና ኬሳ ዳና፤ ኖካሞ ካራናም ፑጋንቱ ኤናናንቱ ኬካሻካ ጌይዲና።
8. ዛርስኖ እሣንቱ ምሽዲና፤ ማአሽን ሽዳይንም ታማርና ክሳ ሻርቃ ሦጳ ጴፅ ጴፅ ፑእሽዲና።
9. ኦጎታርካሞ ኤዲ ሺህ አይዲ ግያማና ዶኖ፤ ኬም ይእሳንቱ ራስባራ፤
10. አጋዛራ ይሳ ታማርና ላማ ጋግንካ ዳልማኑታ ሃንዳይ ራቃዛራ ያእዲና።
11. ፋራሳዊይናካሞ ናዴ የሱስ ላማ ዜርማን ካርስዲና። ኬ ጋሮ የር ሃሊ ፖላሮካ ኬናንቱ ክዳቁካናንቱ አይስዲና።
12. ኖ ይሳ ዎይላምካ ቃባንቱ “ሃርያኖ ኮኖ የር ሃሊ ኬናንቱ ዳዋዴካናንቱ ኮዛጋይኖ ሃርናንቱቱ? እንታ የናንቱ ጎንዴና እጌያይ፤ ሃርያን ኮናንቱ የር ሃሊ ካላካሞ ዳዋዲማኖና!” ክያማይ።
13. ሃያንቱ ኬም ጋራንቱ ጋግንካ ሳባራ ሳግዲና።

ፋራሳዊይናቤ ሄሮዶስቤሳ ቡካ

14. ታማርና ክሳ ባላሻን ባአዳን ኬዋልዶንታካ፤ ባላሻ ካላሳ አባራ ጋግሮ ባላሻ አብ ኬሳ ቆልማሞ።
15. የሱስካሞ፤ “የል ሃሊ ሼድማቱ፤ ፋራሳዊይናቤ ሄሮዶስቤሳ ቡኮሮካ የም ማንክማቱ” ሃማንቱ ኬናንቱ ጌይዲና።
16. ኬካሞ “ኦጎንታ ይንናንቱ ዎግያ ክያማይኖ ባላሻ ዎባአድማታካና” ክጊያ ኬያማይ።

- 17. የሱስካም ቃቦ ኪሳም ደሳንቱ ይንታና ኪግያ ክያማዶ፡- “ባላሻ ዎባአድሞንታኸው ሃማንቱ የደላቃይኖ ሃርቴ? ታኸም የቲህ ጳቅሳዬው? የቲህ የሳ ዎይላምር ዎዳዬው? ሞ ዎይላም የሳ ካይዲው?”
- 18. አፕኖ የሳ ኮዳኻ የቲህ ሃፓዬው? ቃሞኖ የሳ ኮዳኻ የቲህ ኤሳራዬው? የቲህ ጳቅሳዬው?
- 19. ባላሻ ዶንኻም ኤዲ ሺህ ዶንኻናንቱ እቁንገዶን ዎዳንካ ማአሽን ሽዳዶንም ሻርቃ ሜም ጱፅ ጱፅ የፑእሻዴና?” ኪግያ ክያማዶ። ኪኸም ሻርቃ ታጲ ላማና ኪያማዶ።
- 20. “ባላሻ ሦጳም ኤዲ ሺህ አይዲናንቱ እቁንገዶን ዎዳንካ ማአሽን ሽዳዶንም ሻርቃ ሜም ጱፅ ጱፅ የፑእሻዴና?” ክያማዶ። ኪኸም “ሻርቃ ሦጳና” ክግያ ኪያማዶ።
- 21. ኖኸም “ታ ካውል የቲህ ጳቅሳዳዬውና?” ኪግያ ክያማዶ።

ቤቴ ሳይዳር ኤያ ፓሽሻዳዳ አፕን ካያ

- 22. ሃያንቱ ኪ ቤቴ ሳይዳዛራ ናእዲና። ኤዲ ቶኸ ዋኒ ኤዲ አፕ ካያ ካላም የሱስዛራ አንጣቴ ናዴ፤ ኤያም አኒ ይሳኸ ክላአሴኸናንቱ ኪም ምስክዲና።
- 23. ኖኸም ኤያ አፕን ካያሳ አኒም የዳንቱ ሞሮን ኢሮኸ ቡላንቱ፤ አፕና ክሳዛራ ፓጺ ማማንቱ አኒን ይሳኸ አፕና ክሳም ላአሳንቱ፤ “የር ሃናንቱ ሃፕንዳዳ ዳይዲው?” ሃማንቱ አይስዲና።
- 24. ኖኸም ዞን ካቺ ሃማንቱ፤ “ኤና ሃቃግያ ኪያይካና እያፓይና” ክግያ ክያማዶ።
- 25. የሱስ ፕርካም ኤያሳ አፕና ግዶር አኒ ይሳም ዎድዲና፤ ዎዳስ አጋኸ ኤያሳ አፕና ፖቺምዲና፤ አፕና ክሳ ጫንቃል ሃምዲና፤ የር ፓይላ ውልም ጫንቃል ሃፓን ቻሊዲና።
- 26. ሃያንቱ የሱስ ክግያ “ሞሮንዛራ ሃአርድናኖ! ሞሮኮኸም ኤዲ ካላናንቱኸም ሃጌይናኖ” ሃማንቱ ኪም ክሳ እኖንዛራ ይእስዲና።

ጴጥሮስ የሱስ ባሪያ ናሳ ክዶንም ደሴዲና

- 27. የሱስ ይሳ ታማርና ላማ ፊልዶስ ቂሳርያ ሞሮናዛራ ያእዲና፤ ጎይሮኸም ይቴ ዳሃንቱ ይሳ ታማርና ግያ “ኤና እግያ ሃው ኪያሜ?” ሃማንቱ ኪኸሳ አይስዲና።
- 28. ኪኸም “ኑንቆንካ ሻያያ የዎንስና ሃማይና ኤናኸም ዳይዲና፤ ኤና ዋኒ ሃግያ ኤልያሲና ኪያማይ፤ ኤና ዋኒካም ሃግያ እና ኤና ባሪያሳ አፓን ጌያይና ግዶር ካላና ኪያማይ” ሃማንቱ ክናንቱ ማሲዲና።
- 29. ጫግሻንቱ ኖ “ኤ፣ የቲህ እግያ ሃው ያሜ?” ሃማንቱ ኪም አይስዲና። ጴጥሮስ “ያ ክርስቶሲና” ክግያ ክያማዶ።
- 30. የሱስካም ክሳ የር ኤናናንቱ ጌያን ኪጋሬኸናንቱ ኪም ኪሊዲና።

የሱስ ይጃይንም ብርሳንቱ ጌይዲና

- 31. ሃያንቱ ኤዲ ናሶ ጋሎ ጱፅ ኮጋላንቤ፤ ዞንዛናቤ፤ ኤና ካህንናሳ ጋርናቤ፤ ኤና ሙሴ ዳምብን ኡካይናቤ ኪም ኪቦዎይንም፤ ሃያንቱ ኪም ኪዴሳይንም፤ ሮራ ማክንጣኸ ዴምጲንባራኸ ክዳጳይንቤም ኖ ኪም ታማርሳን ካርስዲና።
- 32. ኖ ኪናንቱ የራ ክናም ማይ ጌይዲና። ዎዳ አጋኸ ጴጥሮስካም ኪም ዎና ቡላንቱ ጎራን ካርስዲና።
- 33. ኮዶን የሱስ ሽራንቱ ይሳ ታማርናም ሽዳንቱ ጴጥሮስ ግያ፤ “ያ ሜሻ፤ እሳ ራስዛራ ይማ! ያ ኤዲ ቃቦና ሃዴሳዶ፤ ባሪያ ቃቦንም ያ ሃቃብማም” ሃማንቱ ኪም ጎርዲና።
- 34. አጋሳ ራስባራ ዛርስንም ይሳ ታማርና ላማ ይዛራ ግስማንቱ ይንታና ክያማዶ፡- “ኤዲ ኢም ጫጋናንቱ ናሻያ ይዳና ይናንቱ ቃባን ክጋሬ፤ መስቀልን ይሳም ባአንቱ ኢም ክጫጌ፤
- 35. ኤና ሳዳን ይሳ ዳአሻናንቱ ዛጋይና ፓይላ ይሳ ሳዳን ካይሳና ኪካይሳይ፤ ኮዶን እቤ እሳ ዴላቅን ገሊንቤናንቱ ሃማንቱ ኤና ይሳ ሳዳን ካይሳና ፓይላ ይሳ ሳዳን ዳአሻና ኪዳአሻይ።

- 36. ኤዲ ፔን ኮም ፓይላ ይንቲ ሃያንቲ፤ ሳዳን ይሳም ክካይስና ክናንቲ ኦጎኖ ሃር ኮማቴ?
- 37. ኤሳንካ ኤዲ ይሳ ሳዳንሳ ሜቴሮ ክዎሳያ ሃርቲ ክሳ ዳ?
- 38. ሃርያን ቡሎንቡ፤ ሴሶን ጋን ኮቤሳ ባክሮ፤ እቤ፤ እሳ ዴላቅንቤኻ ኤና ቦክንዳይና ፓይላ፤ ኤዲ ናሶ እምባሳ ሃሽንካ ባሪያሳ ኤርጎን ኤና ጫራቫና ላማ ይኒና ኤና እግናም ኖ ቦክንዳና ክቦክንዳይ።”

የሱስሳ ብሽኖ ሼሽክዲና

ማርቆስ 9

- 1. ጫግሻንቲኻም ኖ ኬግያ “እንታ የናንቲ ሃንዴና እጌያይ፤ ኤና ክና ዎያዳናሳ ባክሮ ባሪያሳ ማንግስትኖ ካንታንካ ኮናአይን ይሳ ሃፓዛራ ኤና ዋኒ ዴምጲን ጂምና ዳይዲና ና” ክያማዶ።
- 2. ሮሮ ላይሳኻም ራስባራ የሱስ ጴጥሮስቤ፤ ያዕቆብቤ የዋንስቤም ጫግሻንቲ ጌማር ጉዳጲ ካላዛራ አንሣንቲ ዉትዲና፤ አጎታርካም ይዳሪና ኬዶ፤ ኬሳ ዎትሮኻም ብሽኖ ክሳ አክምዲና።
- 3. አፓላኖ ክሳ ፔሮጎ ኤዲ አፓላ ጩባያ ካላሳ ጩባንቲ ጫውልሻዳያሳ ጳባራ ካልሎን ጫውሊ ማትዲና።
- 4. ኤልያስቤ ሙሴቤ የሱስ ላማ ክንካ ኬያሳውካ ክናንቲ ሃፕንዲዲና።
- 5. ጴጥሮስ የሱስ ግያ “አስታማራዮ፤ ራቃ ካሮ ዎዳና ዎናንቲ ባሺና፤ ጋፓ ካላም ሃናንቲ፤ ካላም ሙሴናንቲ፤ ካላም ኤልያስናንቲ ጋፓ ማካም ዎኬና” ክያማዶ።
- 6. ኬ ጌጲ የኩርትንዳዶንታኻ የራ ይጌያያም ዴስማም።
- 7. ሃያንቲኻም ሉፕኖ ናዴ ኬም ክጭዲና፤ ሉፕንሣ ኢሮጎ “አጋ ናሳ እሳ እናሻያና፤ ኬም ኤሳርማቴ!” ሃማያ ዩዎ ኤሳርምዲና።
- 8. አጋዛራ ይሳ ዴምር ኬሼድና የሱስሳ አባራ ኤዲ ካላኻም ኬላማ አብ ቆልማም።
- 9. ጌማርታባራ ይያንቻን ዋዳንካ ኤዲ ናሶሳ ዴምጲሮኻ ክሳ ዳጳዛራ የራ ይያፓዳናም ኤዲ ካላናንቲኻም ጌያን ኬጋሬኻናንቲ ኬም ክሊዲና።
- 10. ኬኻም አፓ ኬናንቲ ጌይዳዳም ይሳ ዎይላምሮጎ ዎድዲና፤ ኮዶንካም ዴምጲንባራ ዳጳዳይኖ ሃር ኮዶንም ክንካ ዴላቅቲና ኬዶ።
- 11. ሃያንቲኻም “ኤና ሙሴ ዳምብን ኡካይና ብራንቲ ናአንግያንዳ ኤልያሲና ሃርናንቲ ኬያሜ?” ሃማንቲ ክካላ ኬ አይሲዲና።
- 12. የሱስካም ኬግያ “ይያማንካም ኤልያስ ብራንቲ ናዴ የር ፓይላ ውልም አና ኮዳግያ ሃያና ክያያይ፤ ታ ኤዲ ናሶ ጋሎ ጴፅ ክጋሌኻናንቲቤ ኬም ቦዋዴኻናንቲ ይንናንቲን ዋርቃትሮጎ ኡካዳዶኖ የኻላ ሃር ኮታኬ?
- 13. ኮዶንካም እንታ የናንቲ ጌያና እጌያይ፤ ኤልያስ ብራንቲ ናእዲና፤ ኬኻም ክሳ ዋርቃትሮጎ ኡካዳዳግያ የራ ይዛጋዳናም ክዛራ ሃይዲና ና” ክያማዶ።

ናሳ ኡስን ዛርቦን ይንዛራ ይዳ ፓሺዲና

- 14. ታማርና ይሳ ሽዳዳናዛራ ማታቲ ኬንና ዛርቦን ጴፅኖ ኬም ታኻንቲቤ ኤና ሙሴ ዳምብን ኡካይና ኬላማ ክንካ ዜርምቲ ኬዳኻ ኬ ሃፕዲና።
- 15. ዛርቦኖ ፓይላ ኬም ይያፓና አጋዛራ የርሻንቲ ኬም ጌሳናንቲ ክዛራ ጎባኻ ናእዲና።
- 16. ኖኻም “ኬላማ ክንካ ይንናንቲን የዜርማይኖ ጎይ ሃርባራቲ?” ሃማንቲ ኬኻላ አይስዲና።
- 17. ዛርቦንሣ ባክሮ ኤዲ ካላ ክግያ፤ “አስታማራዮ፤ ኡስን ዛርቦን ይንዛራ ዳአንቲ አፓን ይዱዲሳዳ ናሳ እሳ እንታ ሃዛራ ባአቲ ናእዲና ና” ክያማዶ።
- 18. ባሪያምኖ ክሳ ኮዳጳን ዋዳንካ ኬም ዳባና ኮዳባይ፤ አፓንካ ክሳ ዱቦና ዉታይ፤ ይሳ ግግርን ማሳና ክማሳይ፤ ብሽኖ ክሳ ዛባና ኮዛባይ፤ ኡሳ ዛርቦም ኬቡሌኻናንቲ ታማርና ሃላም እንታ አይስዲና፤ ኮዶን ኬ ቻልዲማም።”

19. የሱስ ኬናንቴ ማሳንቴ፤ “የቲህ ሃርያኖ አምንሞኖ ኮኖ፤ ላይ ሃማዛራ የላማ ክንካ እዴ? ላይ ሃማዛራ የናንቴ እዴንጅ? ናሳም አራ ኢዛራ ባአማቴና!” ክያማዶ።
20. ኤናኻሞ ክዛራ ባአቴ ናእዲና፤ ኡሳ ዛርባኻሞ የሱስም ይፓዶን ዋዳንካ ናሳም አጋዛራ ግባዝሰዲና፤ ኖኻሞ ፔሮጎ ጳርፃንቴ ግርጫ ጋእዲና፤ አፖንካ ክሳ ዱቦ ዉታን ካርስዲና።
21. የሱስ ናሳሳ እምባግያ፤ “ናሳም ኡሳ ዛርባ ክየዳኻ ሃማግያ ክካፓዴ?” ሃማንቴና ክአይሳዶ። ኖኻሞ ክግያ፤ “ክሳ ናሳሞሮኻ ካርሳንቴና፤
22. ኪም ዴሳናንቴ ይዛጋዶንታኻ እይ ጲፅ ኖርቤ ኑንቆርቤ ዳብዲና፤ ኮቻሊማያ ዳና ዎናንቴ ቡርቃዲማ፤ ዎም ኬልሽማ” ክያማዶ።
23. የሱስካሞ ክግያ “ ኮቻሊማያው ሃማዶ? ኤያ አምናያናንቴ የር ፓይላ ውል ቻሊማና ኮቻሊማይ ና” ክያማዶ።
24. አጋዛራ ናሳ እምባኻሞ የሱስ ግያ፤ “እንታ አምናና እአምናይ፤ እንታ እአምናድሞን እባሼኻናንቴ ኢም ኬልሽማ!” ሃማንቴ እላትዲና።
25. የሱስካሞ ዛርስኖ ባቃንቴ ክዛራ ጎባኻ ኮናአይንም ይያፓና፤ “ያ ቃሞን ካያቤ አፖንሣ ዱዳቤ ኡሳ ዛርባ ክባራንካ ዉትማ! ናንሢ ማታንቴ ክዛራ አርዳን ሃጋሬኻናንቴ እንታ ሃናንቴ ጌይዲና” ሃማንቴ ኡሳ ዛርባ አይትዲና።
26. ኡሳ ዛርባ እላታንቴ ናሳም ካልሎን ማርፅ ማርፅ ዳባንቴ ክባራንካ ዉትዲና። ኤዲኖ ጲፅኖ “ኖ ጃይዲና” ኮሳ ሃማዛራ ናሳኻሞ ኤዲ ጃዳግያ ማትዲና።
27. ኮዶን የሱስ አኒን ክሳም የዳንቴ ዳሲዲና፤ ናሳኻሞ ዳጳንቴ ዎይዲና።
28. የሱስ አኖንዛራ ክአርዳኻ ታማርና ክሳ ይዳር፤ “ዎቲህ ቡላናንቴ ይንናንቴን ዎቻላድማ ሃርናንቴቴ?” ሃማንቴና ክካላ ኬአይሳዶ።
29. ኖ ኬግያ ይጌይና፤ “ኮግያሞኖ ይንካ ኮውታይኖ ባሪያም ምስኮቤ ቶሮንዳንቴ ባሪያ ምስኮቤ ሶጎና ና” ክያማዶ።
30. አጋሮኻ ኬ ዳጳንቴ ገሊላኻ ሳግዲና፤ የሱስ ክዳ ራቃም ኤዲ ካላኻሞ ኮዴቤኻናንቴ ዛጋድማሞ።
31. ታማርና ይሳናንቴኻሞ፤ “ኤዲ ናሶ ኤናሳ አኒካ ሳስካንቴ እማና እንዳይ፤ ኬኻሞ ኪም ዴሳና ኬዴሳይ፤ ሮሮ ማካንሣ ራስባራ ዳጳና ክዳጳይ” ሃማንቴ ታማርስቴና ክዶ።
32. ኮዶን ኬኻሞ ኬናንቴ የራ ክጌያይና አርድማሞ፤ ኮሃማይን ክካላ አይሳናንቴ ኬ ኩርቲንዲዲና።

ውል ካላንካ ሳጋያ ሃውቴ?

33. አጋሳ ራስባራ ቅፍርናሆምዛራ ኬ ናእዲና። ኖ አኖን አርዳንቴ ራስባራ “እኒ ጎይሮጎ የክትማይኖ ሃርባራቴ?” ሃማንቴና ኬኻላ ክአይሳዶ።
34. ኮዶን ኬኻሞ እኒ ጎይሮጎ ኬክትማይኖ ውልካላ ሳጋያ ሃውቴ ሃማያ ጎያባራ ኮዶንታኻ ኬ ጫካምዲና።
35. ኖ ዳርቃንቴ ታማርና ይሳ ታጲ ላማናም ግስማንቴ ኬግያ፤ “ብራሮጎ ዳናንቴ ኤያ ዛጋያ ኤና ውልሳ ቱንሢርቤ ኤና ውልናንቴ ዋዲማያቤ ክዴ ና” ክያማዶ።
36. ናሶ ሾሊ ባአንቴ ኬሳ ባክሮጎ ዎይስዲና፤ ኪም ሹባንቴ፤
37. “ናና ሾሊና ክና ግዶር ካላም እሳ ናብንካ ኤያ ቻያ ኢም ቻና ክቻይ፤ ኤያ ኢም ቻያኻሞ ኢም ሶጎ ጋራንቴ ኤያ ኢም ንእሳዳም ካውልና ክቻይ ና” ኬግያ ክያማዶ።

ኤና ዎም ቶዛዲምና ፓይላ ዎላማ ክንካና

38. የሞንስካሞ፤ “አስታማራቶ፤ ኤዲ ካላ ሃሳ ናብንካ ቤርናም ክቡልካ ዎቲህ ሃፕዲና፤ ዎም ክጫግሞንታኻ ዎቲህ ኪም ማርዲና ና” ክያማዶ።
39. ኮዶን የሱስ ይንታና ክያማዶ፡- “የማርናኖ፤ ኤዲ ካላ እሳ ናብንካ የርን ሃሚማንግያዶንም ሃያንቴ ይሪካ እዛራ የር ዛርቦ ጌያናንቴ ቻሊማሞ፤

- 40. አጋታኝ ኤና ዎም ቶዛጲምና ፓይላ ዎላማ ክንካና፤
- 41. እንታ የናንቴ ጎንደና እጌይይ፤ የቲሀ ክርስቶስ ጋንት የደንታኝ፤ ኤያ እሳ ናብንካ የናንቴ ኑንቆ ሻርቃ ካላ እማያሳ ባዛ ካይማሞ።”

ኤያ ዋናንቴ ዱርሚ ማቲንቶ

- 42. “ኤና ኢም አምናይና ሻቃቅ ሃምና ክናሳ ካላም ኤያ ራስዛራ ማሳያሳ አጋሳ ሱኒ ዴስማያ ደፃ ቆርጭሮ ዳካንቴ ኛፓስሮ ዳባድዳና ባሺና።
- 43. አጋታኝ አና ሃሳ ሃም ሴሶዛራ ክባአያዳና፤ ቱምማ፤ አን ላማኝ ዳአንቴ ጋሃንምንዛራ ሃአርዳንናንቴ ዱጃ ዳአንቴ ሳዳንዛራ ሃአርዳይኖ ሃናንቴ ባሺና፤
- 44. ጋንምሮ ቃዮና ጂማሞ፤ ኖኖኝሞ ካይማሞ።
- 45. ራ ሃሳ ሃም ሴሶዛራ ክአንሣያዳና፤ ቱምማ፤ ራ ላማኝ ዳአንቴ ጋሃንምንዛራ ሃዳባዳንናንቴ ሾኾሎ ዳአንቴ ሳዳንዛራ ሃአርዳይኖ ሃናንቴ ባሺና፤
- 46. ጋንምሮ ቃዮና ጂማሞ፤ ኖኖኝሞ ካይማሞ።
- 47. አፓ ሃሳ ሃም ሴሶዛራ ክአርሳያዳና፤ ኮቻራቴ ቡልማ፤ አፒ ላማኝ ዳአንቴ ጋሃንምንዛራ ሃዳባዳንናንቴ አፒ ካላኝ ባሪያሳ ማንግስትንዛራ ሃአርዳይኖ ሃናንቴ ባሺና፤
- 48. ጋንምሮ ቃዮና ጂማሞ፤ ኖኖኝሞ ካይማሞ፤
- 49. አጋታኝ ኤና ፓይላ ውልም ኖንካ ኮቃና ኮቃዳይ።
- 50. ሶቆ ፃሊና፤ ኮዶንካሞ ሶቆ ሶቆ ኮታክምና ሃስ ሃያንቴ ማሳቴ ኮዳፀኝናንቴ የያዬ? ሶቆ የሳ ኢሮጎ ኮዴ፤ ክሳካሞ አፖም ናሽማቴ።”

አይ ቡላ

ማርቆስ 10

- 1. የሱስ አጎታርካ ዳጳንቴ ይሁዳ ፔንቤ የርዳኖስ ሌኤንሣ ሳባራን ራቃ ዳዛራ ያእዲና፤ ዛርስኖ ፕርካሞ ክካላ ፑጭዲና፤ ኖ ብራንቴ ይያያያግያ ኬም ታማርስዲና።
- 2. ፋራሳዊይና ዋኒ ክካላ ናዴ፤ “ኤዲ ካላ ይሳ ሜንሣ አይን ክቡሌኝናንቴ ጌይዲዲው?” ሃማንቴ ዴሳንቴ ዴሳድማግያ ኬ ጋሮ ክካላ አይስዲና።
- 3. ኖ ኬናንቴ ይማሳና፤ “ሙሴ ሃር ሃማንቴ የናንቴ ክጌያዴ ና?” ክያማዶ።
- 4. ኬኝሞ ክግያ፤ “ሙሴ ኤያ ሜን ይሳም ይንካ ይቡላያ ኤላቃም ዋርቃትሮጎ ኡካንቴ ሜኒም ቡልዴኝናንቴ ጌይዲና ና” ኬያማዶ።
- 5. የሱስ ኬናንቴ ይማሳና ይንታና ክያማዶ፡- “ሙሴ ዳምብን አጎም ይንናንቴ የናንቴ ክኡካዶኖ የሳ ዎይላምሳ ቆራሞ ሼዳንቴና።
- 6. ኮዶንካሞ አና ኤናም ባሪያ ይዎዶንሣ ካርስሮ አንጌቤ ሜቤ ሃያንቴ ኬም ክዎዳዶ።
- 7. አጋታኝ ኤዲ ናሶ እምባቤ እንዳንቤም ጋራና ክጋራይ፤ ይሳ ሜን ላማኝሞ ክንካና ክዳይ።
- 8. ኬላማ ውል ማአሲ ካላና ኬማታይ፤ ናንሢ ኬ ማአሲ ካላና፤ ኤዲ ላማ ትማሞ፤
- 9. አጋታኝ ባሪያሳ ማአሲ ካላ ሃይዳዶን ኤዲ ካላካሞ ኬም ፓሽሻን ኮጋሬ።”
- 10. ፕርካሞ ማታቴ አኖንዛራ ኬአርዳና፤ ታማርና ክሳካሞ የራ እግናም ክካላ ማሳቴ አይስዲና።
- 11. ኖኝሞ ኬግያ ይማሳና፤ “ኤዲ ካላ ሜን ይሳም ቡላንቴ ሜ አብ ኬማያ ሜን ይሳዛራ ቡላሞና ክያአዶ፤
- 12. ኖኝሞ አንጋ ይሳም ቡላንቴ አንጌ አብ ይኬማዲና፤ ኖኝሞ ቡላሞና ኮያአይ ና” ክያማዶ።

የሱስ ናናናንቴ ፓሊ እምዲና

- 13. የሱስ ናናናንቴ አን ይሳም ክዳኤካናንቴ ኤና ናናም ክዳኤ ባአቴ ናእዲና፤ ኮዶን ታማርና ክሳ ኤናም ጎርዲና።
- 14. የሱስ አጋም ሃፓንቴ ዋጭማንቴ ኬግያ ይንታና ክያማዶ፡- “ናና እዛራ ኬኔኤ፤ የማርናና፤ ባሪያሳ ማንግስትና ኬግያምና ናንቴና።
- 15. እንታ የናንቴ ጎንደና እጌያይ፤ ባሪያ ማንግስትንም ኤና ናና ጋንታግያ ቺምና ኮዛራ ካላካም አርድማም።”
- 16. ናናም ሹባንቴ አን ይሳም ኬዛራ ዎዳንቴ ኬናንቴ ፓፅን እምዲና።

ባርሻስ ዎድንታሳ አይሳ

- 17. ሃያንቴ ኖ አጎታርካ ዳጳንቴ ጎይን ያአን ክካርሳና፤ ኤዲ ካላ ጎባካ ክዛራ ናዴ ክሳ ዎትሮ ኮምፓርሳንቴ ክግያ፤ “አስታማራ ፃላ፤ ሳዳን ላይን ዳይንም ሃፓናንቴ እባራ ሃር ሃይንቶ ኮዛግሴ ና?” ክያማዶ።
- 18. የሱስ ይንታ ሃማንቴ ክናንቴ ማሲዲና፡- “ሃርናንቴ እግያ ፃላ ሃያሜ? ባሪያ ካላስሳ አባራ ኤዲ ፃል ቆልማም።
- 19. ዳምብናም ያ ደስዲና፡- “ሃዴስናኖ፤ ቡሎ ሃዳናኖ፤ ሃዲብናኖ፤ ፓጋምካ ማኚ ሃዳናኖ፤ ኤዲም ሃታይስናኖ፤ ሃምባቤ ሃንናቤም ጎብማ።”
- 20. ኤያካም ክግያ፤ “አስታማራዮ፤ እሳ ናሳምሮካ ካርሳንቴ ዳምብና እግና ፓይላ ውልም እንታ ጫግዲና ና” ክያማዶ።
- 21. የሱስካም ኤያም ሹዳንቴ ናሽዲና፤ “ታ ናንሢ ሃሳ የር ካላ ጀግዲና፤ ቃልቴ ኮይና ሃሳ ዳናም ፓይላ ሻንሸማ፤ ኤና ኩፕናናንቴ እምማ፤ ጳ ፖላሮ ዎዲማምን ቻና ሃቻይ፤ ሃያንቴካም ናዴ ኢም ጫግማና” ክግያ ክያማዶ።
- 22. ኤያካም እግናም ይኤሳራና ላፖ ክሳም ጃይዲና፤ ኮይሶኖ ክሳ ጴፅ ኮዶንታካ እልል ጃንቴ ያእዲና።
- 23. የሱስ ይሳ ዴሞዛራ ሹዳንቴ ይሳ ታማርና ግያ፤ “ኤና ዎድሞናናንቴ ባሪያ ማንግስትንዛራ አርዳኖ የር ካልሎን ሃምንታ ዋቺቴ ና!” ክያማዶ።
- 24. የራ ክጌያዳና ታማርና ክሳ ናንቴካም የር ዋና ማትዲና፤ ኮዶን የሱስ ፕርካም ኬግያ ይንታና ክያማዶ፡- “ናናቶ፤ ባሪያሳ ማንግስትንዛራ አርድንቶ የር ሃምንታ ዋቺቴ!
- 25. ኤና ዎድሞና ባሪያሳ ማንግስትንዛራ ኬአርዳንናንቴ ጋማላ ማርፌሳ ፑላካ ኮውታይኖ ባዶና።”
- 26. ታማርና ናንቴካም ካልሎን የር ዋና ኮማቲኝ፤ “ታ አጎንታ ዳና ሃውቴ ዳቃናንቴ ቻላያ ና?” ክጊያ ኬያማዶ።
- 27. የሱስ ኬም ሹዳንቴ፤ “ኮኖ ኤዲ ናሶናንቴ ቻሊማም፤ ኮዶን ባሪያናንቴ አጎንታ ትማም፤ ባሪያናንቴ የር ፓይላ ውል ቻሊማና ኮቻሊማይ ና” ኬግያ ክያማዶ።
- 28. ጴጥሮስካም ክግያ፤ “ዎቲህ የር ፓይላ ውልም ጋራንቴ ሃም ጫግዲና ና” ክያማዶ።
- 29. የሱስካም ኬናንቴ ይንታ ሃማንቴ ማሲዲና፡- “እንታ የናንቴ ጎንደና እጌያይ፤ እቤ፤ እሳ ደላቅን ፃሊን ኮቤናንቴ ሃማንቴ ይሳ አኖንቤ፤ እንዳን ናናቤ፤ እንዳን ናና አንዛናቤ፤ እንዳንቤ፤ እምባቤ ይሳ ናናቤ፤ ሃምንቤም ኤያ ጋራዳ ፓይላ፤
- 30. ታ ዋዳን ኮካ ባቆን ላማ አኖናቤ፤ እንዳን ናናቤ፤ እንዳን ናና አንዛናቤ፤ እንዳናቤ፤ ናናቤ ሃሚናቤም እይ ማቶሳ ጳባራ ችማ፤ ፔን ሃሊን ናአናናንቴን ዶሮ ሳዳን ላይ ዳይንም ኤዲ ችማ ሽዳያ ቆልማም።
- 31. ኮዶንካም ኤና ጴፅና ብራሮን ዳና ራስዛራና ኬያአይ፤ ራስባራን ዳናካም ብራኒና ኬሳጋይ።”

የሱስ ፕርካም ይጃይንም ብርሳንቴ ጌይዲና

- 32. የሩሳሌምዛራ ዉቲቴ ኬዳኝ፤ የሱስ ኬም ብራንቴ ይቴና ክዶ፤ ታማርና ክሳ ናንቴካም የር ዋና ማትዲና፤ ኤና ዋኒ ኪም ጫግቴን ዳናካም ኩርቲንዲዲና። ሃያንቴ ታማርና ይሳ ታጲ ላማናም ዛርስን ካላ ዋና ቡላንቴ ክዛራ ሃር የስካናንቴ ኮዶንም ኖ ጌይዲና፤

- 33. ይንታኻሞና ኬግያ ክያማዶ፡- “የሩሳሌም ዛራ ወታና ዎወታይ፤ ኤዲ ናሶም ካህንናሳ ኤና ጋርናቤ ኤና ሙሴ ዳምብን ኡካይና ናንቴ ሳስካንቴ እማና እንዳይ፤ ኬኻሞ ክጄኻናንቴ ክዛራ ብቶን ታኻና ኬታኻይ፤ ሳስካንቴ ኤና ቶርስና አብናናንቴ እማና ኬእማይ፤
- 34. ኬኻሞ ክንካ አልማና ኬአልማይ፤ ክዛራ ፓፅን ማማና ኬማማይ፤ ኪም ዳና ኬዳይ፤ ሃያንቴኻሞ ዴሳና ኬዴሳይ፤ ኮዶን ኖ ሮሮ ማካምንሣ ራስባራ ዴምጲንባራ ዳጳና ክዳጳይ።”

ያዕቆብቤ የዋንስቤሳ አይሳ

- 35. ሃያንቴ ዘብዲዮስ ናና ያዕቆብቤ እንዳን ናሳ የዋንስቤ ክካላ ናዴ ይጌይና፤ “አስታማራዮ፤ የራ ሃኻላ ምስክርናም ፓይላ ምናንቴ ሃየኻናንቴ ዛጋና ምዛጋይ ና” ኬያማዶ።
- 36. ኖ “ሃር የናንቴ እያየኻናንቴ የዛጌ ና?” ኬግያ ክያማዶ።
- 37. ኬኻሞ “ሃሳ ጎሺንካ ሃዳርቃን ዋዳንካ ምሳ ካላም ሃሳ ምዛቅባራ፤ ካላም ሃሳ ዋርካታባራ ምዳርቄኻናንቴ ናሽማና” ኬያማዶ።
- 38. የሱስ ኬግያ፤ “የቲህ የራ የምስክርና ዴስማሞ፤ እንታ ይንካ እውጫያ ሻርቃስካ ውጫናንቴ ቻላው የቻላይ? ሻዮ እሻይዳይንም ሻይዳናንቴ ቻላው የቻላይ ና?” ክያማዶ።
- 39. ኬኻሞ፤ “ዩኒ፤ ቻላና ምቻላይ ና” ኬያማዶ። የሱስካሞ፤ “እንታ ይንካ እውጫያ ሻርቃስካ ውጫና የውጫይ፤ እንታ ሻዮን እሻይዳይንምካሞ የቲህ ሻይዳና የሻይዳይ፤
- 40. ኮዶንካሞ እሳ ምዛቅባራቤ ዋርካታባራቤ ዳርቅንታኖ ኤና ይንናንቴ ቃባዳዳናንቴ ዳያና፤ እንታ እባራንካ የር ኢእማያ ትማሞ ና” ኬግያ ክያማዶ።
- 41. ታማርና ክሳ ታጲና ዋኒ እግናም ይኤሳራና ያቆዕብቤ የዋንስቤዛራ ዋጭማን ካርስዲና።
- 42. የሱስ ኬም ክዛራ ፑእሻንቴ ይንታና ኬግያ ክያማዶ፡- “ቶርስን ኤናሳ ኤና ጋርና ሃማንቴ ቃባዳይና ኬዛራ ጌጲ ኬዶንቤ፤ ኤና ኬሳ ጌጲና ኬዛራ ይሳ ጌጲምንም ኬዳዋይንም የቲህ ዴስዲና።
- 43. ኮዶን የባራ ኦጎንታ ትማሞ፤ የሳ ባክሮጎ ኤዲ ጋሪ ማታናንቴ ኤያ ዛጋያ፤ የናንቴ ዋዲማያ ክዴ፤
- 44. ኤያ ብራሮ ዳናንቴ ዛጋያ፤ ኤና ውልሳ ካይሲ ክዴ፤
- 45. አጋታኻ ኤዲ ናሶ ኤናናንቴ ዋድማናንቴቤ ሳዳን ይሳም ኤዲ ጲፅናንቴ ባዛ ሃያንቴ እማናንቴና ክናአዶ፤ ክናንቴ ዋድማዴኻናንቴ ትይማሞ ክናአዶ።”

የሱስ ኤያ አፕን ካያስ በርጤሜዎስም ፓሽሽዲና

- 46. አጋሳ ራስባራ ኢያራተዛራ ኬ ናእዲና። የሱስቤ፤ ታማርና ክሳቤ ዛርስምቤ ኢያራተባራኻ ኬውትና፤ ኤያ አፕን ካያስ ጤሜዎስ ናሳ በርጤሜዎስ ጎይንሣ ዴሞሮ ዳርቃንቴ ምስክምቴና ክዶ።
- 47. ኖኻሞ ናዝሬት ጋንታ የሱስ ክዶንም ይኤሳራና፤ “ዳዊት ናሳ፤ የሱስ፤ እናንቴ ቡርቃዲማ!” ሃማንቴ እላታን ካርስዲና።
- 48. ኤዲኖ ጲፅኖኻሞ ጫክ ክያሜኻናንቴ ኪም ጎርድና፤ ኮዶን ኖ “ዳዊት ናሳ እናንቴ ቡርቃዲማ!” ሃማንቴ ካልሎን እላትዲና።
- 49. የሱስካሞ ምያንቴ፤ “ኪም ግስምማቴና” ክያማዶ። ኬኻሞ ኤያ አፕን ካያስግያ፤ “ሃይ ሌምማ፤ ዳጵማ፤ ሃም ግስምዲና ና!” ኬያማዶ።
- 50. ኖ አፓላን ይሳም ዳባንቴ፤ ዳጳንቴ የሱስዛራ ናእዲና።
- 51. የሱስካሞ ክግያ፤ “ሃናንቴ ሃር እያየኻናንቴ ሃዛጌ ና?” ክያማዶ። ኤያ አፕን ካያስካሞ ክግያ፤ “አስታማራዮ፤ ሃፓናንቴ እዛጋይ ና” ክያማዶ።

52. የሱስካም ክግያ፣ “ይማ፣ እምናትኖ ሃሳ ሃም ጳጳሽዲና ና” ክያማዶ። አፕኖ ክሳኻም አጋዛራ ፖቺምዲና፤ ኖ ጎይን የሱስም ጫጋንቴ ያእዲና።

የሱስ ጎሺንካ የሩሳሌምዛራ አርድዲና

ማርቆስ 11

1. ኬ የሩሳሌምዛራ ዔዲናዴ ዳብሬ ዘይት ጌማርታ ዴምሮን ዳና ቤቴ ፋጌቤ ቢታንያቤኻላ ይየስካና፤ የሱስ ይሳ ታማርናሳ ላማም ይንታ ሃማንቴ ኬም ይእስዲና፡-
2. “ሞራ የሳ ዎትሮን ዳዛራ ይማቴ፤ ኤዲ ይንዛራ ዳርቃንቴ ይዴስማ ኡኩል ናሶ ዳክማንቴ ኮዳኻ ሃፓና የያፓይ፤ ቡላንቴ አራ ዳቴ እማቴ።
3. ኤዲ ካላካም የግያ፣ ‘ሃር ሃይቴ የዴ?’ ክያምና፤ ‘ጌጳናንቴ ዛግሳና ክዛግሳይ፤ ኖ ይሪካ ማሳቴ ንእሳና ክንእሳይ’ ሃማንቴ ክናንቴ ጌይማቴ።”
4. ኬኻም ያእዲና፤ አኖ ካሳሳ ሙልዳፖንግ ጎይሮ ኡኩልቶን ናሳም ዳክማንቴ ክዳኻ ኬያፕዲና፤ ኬኻም ቡልዲና።
5. አጎታር ኤና ዎያንቴን ዳና ግዶር ዋኒ፤ “ሃርናንቴ ኡኩልቶን ናሳም የቡሌ ና?” ኬግያ ኬያማዶ።
6. ታማርናኻም የሱስሳ የራ ጌይዳዳናም ኤናናንቴ ኬጌያዶን ዋዳንካ ኤናኻም ዳቴ ኬየኤኻናንቴ እምዲና።
7. ኡኩልቶን ናሳም የሱስዛራ ዳቴ ናዴ፤ አፓላና ይሳም ኡኩልቶን ናሳሳ ዙሎሮጎ ኬአፓኻ ኖ ዛራን ዳርቅዲና።
8. ኤዲኖ ጳፀኖ አፓላና ይሳም ጎይሮጎ አፕዲና፤ ኤና ዋኒካም ቃልጳ ቁንፃንቴ አፕቴና ኬዶ።
9. ኤና ክሳ ብራሮ ይቴን ዳናቤ ክሳ ራስባራ ጫግቴን ዳናቤኻም ናቅሲ ይሳም ዴግ ሃያንቴ ይንታ ሃምቴና ኬዶ፡- “ሆሳዕና፤ ኤያ ጌጳሳ ናብንካ ናአያ ይንናንቴን ፓፀን እንዳዳ ና!
10. ዎምባ ዳዊትሳ ማንግስትኖ ናአይኖ ፑጋዳዳና! ሆሳዕና ጳ ፖላናሳ ፖላሮኻ!”።
11. የሱስካም የሩሳሌም የስክዲና፤ ሃያንቴ ባርዮን አኖንዛራ አርድዲና፤ ይሳ ዴምሮ የራ ዳናም ፓይላ ሼድዲና፤ ፔኖ ኮእባናዶንታኻ ታማርና ይሳ ታጲ ላማና ላማ ቢታንያዛራ ያእዲና።

የሱስ ባርዮን አኖንባራ ኤናም አይቲዲና

12. ዋጋላምንካም ቢታንያ ግዶርካ ኬዉታንካ የሱስ ዳቃዲዲና።
13. ኖ ባላስ ጎብ ካላም ፔጌኻ ሃፕዲና፤ ኬዳ አፒ ካአንቴም ክዶኖ ሃማንቴ ክዛራ ናእዲና፤ ኮዶንካም ባላሳሳ አርፕና ይንካ አፒን ካዳይና ኬትምንታኻ ቃልጳናሳ አባራ የር ካላካም ዛራን ሃፓድማም።
14. ሃያንቴ ባላሳግያ፣ “ሃልታላኻ ካርሳንቴ ኤዲ ካላካም ሃግዶርካ አፒ እሣን ክጋሬ ና” ክያማዶ። ታማርና ክሳ እግናም ክጌያን ኤሳርዲና።
15. የሩሳሌምዛራኻም ኬ ናእዲና፤ ሃያንቴ ባርዮን አኖንዛራ አርዳንቴ፤ ኤና ኮይናም ሻንሻይናቤ ኤና ሻናይናቤም አይታን ካርስዲና። ኤና ብሬን ክናንቴ አስካይናሳ ጠርጴዛንቤ፤ ኤና ዎሌናም ሻንሻይናሳ ቦርኮቶናቤም ውንኩርስዲና፤
16. ኤዲ ካላኻም ባርዮን አኖንግ ኢንካ ኮይሶ ባአንቴ ሳጋን ኮጋሬኻናንቴ ማርዲና።
17. ኬም ይታማርሳ ዋዳንካኻም “ ‘አኖኖ እሳ፤ ቶርስን ፓይላ ውልሳ ምስኮ አኖና ሃንዳይ’ ሃማንቴ ዋርቃትሮጎ ኡካዳዳዮው? ኮዶን የቲህ ኤና ዲብናሳ ጳልው ያያዶ ና!” ኬግያ ክያማዶ።
18. ኤና ካህንናሳ ጋርናቤ ኤና ሙሴ ዳንብን ኡካይናቤ እግናም ይኤሳራና፤ ጎይ ይንካ ኪም ይካይሳያ ዛጋን ካርስዲና፤ አጋኻም ዛርስኖ ፓይላ ታማርን ክሳም ኮየርሻዳኻ ኬ ኪም ኩርቲንዲዲና።
19. ኮእባናናኻም ኬ ካታማስሮኻ ዉታንቴ ያእዲና።

ባላስን ሃቃስ ዋቺዲና

20. ዋጋላምን ቡርን ጎይንካ ኬሳግና ባላስን ሃቃስ ይሳ ጫጭንካ ካውል ዋቻንቴ ክዳኝ ኬ ሃፕዲና።
21. ጴጥሮስናንቴ የራ ጳቅ ክያሟኝ የሱስ ግያ፤ “አስታማራዮ፣ ባላሳ ሃአሻዳ ዋቺዲና ና” ክያማዶ።
22. የሱስካም ማሳንቴ ይንታና ኬግያ ክያማዶ፡- “ባሪያኻ አምንማቴ።
23. እንታ የናንቴ ጎንዴና እጌያይ፤ ኤዲ ካላ ጌማርታ ካግያ ‘ቡጭማንቴ ኛፓስንዛራ አርድማ’ ክያምና፤ አጋምካም ይሳ ዎይላምሮኻ ቡላንቴ ክአምናዳና የራ አጋ ክናንቴ ሃምማና ኬያማይ።
24. አጋታኻ የሳ ምስኮሮ የራ ባሪያኻላ የአይሳዳናም ፓይላ የቻዳግያ ሃያንቴ የአምናዳና የናንቴ ሃምማና ኮያማይ።
25. ሃያንቴ ምስካናንቴ የዎይና የምባ ጳ ፖላን ጋንታ ሴሶን የሳም የናንቴ ክጋሬኻናንቴ፤ የቲህካም ኤናዛራ ሴሶና ዳናም ጋርማቴ።
26. ኮዶን ኤናናንቴ የጋራዲምና የምባ ጳ ፖላን ጋንታኻም የሳ ሴሶናም የናንቴ ጋርማቴ።”

የሱስሳ ጌጳምንዛራ አይሶ ጳጲዲና

27. ፕርካም ኬ የሩሳሌምዛራ ማታቴ ናእዲና፤ የሱስ ባርዮን ኦናንግ ጊብንግ ኢሮጎ ያይቴ ክዳኝ ካህንናሳ ጋርናቤ፤ ኤና ሙሴ ዳምብን ኡካይናቤ ዛርስንግ ዞንዛናቤ ክዛራ ናዴ ክግያ፤
28. “የራ ክናም ሃር ጌጳምኻ ሃዬ? የራ ክናም ሃየኻ ሃናንቴ ጌጳምን እማዳ ሃውቴ?” ኬያማዶ።
29. የሱስካም ማሳንቴ ኬግያ፤ “ይንዳ እንታካም የኻላ አይሶ ካላ እአይሴ፤ ይንዳ የቲህ እናንቴ ማስማቴ፤ እንታካም የራ ክናም ሃር ጌጳምኻ ሃይቴ እዶንም የናንቴ ጌያና እጌያይ ና።
30. የዋንስሳ ሻዮኖ ፖላሮኻም ኮናአዶኖ ሞ ኤዲ ካላንካ? ይንዳ የቲህ እናንቴ ጌይማቴ።”
31. ኬ ክጊያ፤ “ ‘ፖላሮኻና ዋምና’ ኖ ‘ታ ናንግ ሃርናንቴ ኢም አምናን የጋራዴና!’ ዎግያ ክያማይ ና” ኬያማዶ።
32. ታ ‘ኤዲ ባራና’ ዋሜዬው?” ዛርስኖ ፓይላ የዋንስም ኤያ ባሪያሳ አፖን ጌያያ ጎንዳ ሃያንቴ ኮሼዳዶንታኻ ኬ ኩርቲንዲዲና።
33. አጋታኻ የሱስናንቴ “ዎቲህ ዴስማም” ሃማንቴ ኬ ማሲዲና። የሱስካም ኬግያ፤ “ታ ኦጎንታ ዳና እንታካም የራ ክናም ሃር ጌጳምኻ እያያይንም የናንቴ ጌይማጥና” ክያማዶ።

ኤና ዎይንን ሃምንም ይንዛራ ኤልቅንዳዳናሳ ዳይንሦኖ

ማርቆስ 12

1. ሃያንቴ ኖ ይንታ ሃማንቴ ኬናንቴ ዳይንሦኻ ጌያን ካርስዲና፡- “ኤዲ ካላ ይሳ ሃምሮጎ ዎይንን ሃቃን ኮርዲና፤ ዴምን ኮሳም ካርሚ ጫእዲና፤ ኦሎን ይንግዶር ኮም ጩባዳይንም ኮይዲና፤ አንግን ይንግዶር ኮም ዳቃንዳይንም ካይዲና፤ ሃያንቴ ኤና ሃምን ዳቃናይናናንቴ ኤልቅማንቴ ፔ አብዛራ ያእዲና።
2. አፒን ይንካ ካማዳይኖ ዋዳኖ ኮየስካና፤ ዎይንን አፒን ክናንቴ ባአቴ ናዴኻናንቴ ይሳ ካይስና ግዶርካ ካላም ኤና ሃምን ዳቃናይናዛራ ይእስዲና።
3. ኮዶን ኬ ኤያም የዳንቴ ዳንቴ አን ጉሮ ይእስዲና።
4. ፕርካም ካይስና ግዶርካ ካላም ይእስዲና። ኬ ሜቴ ክሳም ፓካንቴ፤ ክንካ አልማንቴ ማስዲና።
5. ፕርካም ካይስ አብ ይእስዲና፤ አጋምካም ኬ ዴስዲና። ኦጎንታ ሃያንቴ ኖ ክይእሳዳና ካይስና ዋኒ ጴፅና ግዶርካ ኬሳ ዋኒም ኬ ዳይዲና ዋኒምካም ኬ ዴሲዲና።
6. ፕርካም ኖ ኤዲ አብ ክይእሳያ ዳይዲና፤ አጋኻም ክሳ ናሳ ክናሻያና፤ ኖ ‘ኬ ናሳ እሳም ጎባና ኬጎባይ’ ሃማንቴ ኤና ፓይላ ውልሳ ቱንሥሮ ይእስዲና።
7. ኮዶን ኤና ሃምን ዳቃናይና፤ ‘ካ ሃምን ዳላያና፤ ንማቴ ኪም ዎዴሴ፤ ሃምንም ዎቲ ዎዳሴ ና’ ክጊያ ኬያማዶ።
8. ሃያንቴ ኬ ኪም የዳንቴ ዴሲዲና፤ ኬ ዎይንን ሃምሮኻ ቡላንቴ ቡዶሮ ዳብዲና።

- 9. ታ ናንሢ ኤያ ወይንን ሃምንሣ እምባ ሃር ክያየ ሃማንቴ የቃቤ? ኖ ናአና ክናአይ፤ ኤና ሃምን ጳቃናይናም ዴሳና ክዴሳይ፤ ወይንን ሃምንካም ኤና ዋኒዛራ ኤልቅማና ክኤልቅማይ።
- 10. አፓ ዋርቃትሮ ይንታ ሃማያም የቲህ ናባባዳዩው፤ ኤና አኖን አሽካይና ይበዋዳ ሱናስ አጋ አኖንሳ ጉራ ማቲዲና።
- 11. ጌጳ አጋም ሃይዲና፤ አጎኖኻም ዎሳ አፕንናንቴ ካልሎን የር ዋና ማቲዲና?”
- 12. ጳይንሣ ክጌያዳ ኬናንቴ ኮዶንም ኬ ይዴሳዶንታኻ ኪም የዳናንቴ ዛግዲና፤ ኮዶንካም ኬ ዛርስንም ይኩርቲንጳዶንናንቴ ኪም ጋራንቴ ያእዲና።

ብታ ቁሳርናንቴ ግብርን ካሻጳይኖ

- 13. ሃያንቴ ኪም ዴሳቅካ ጳብንሻናንቴ ኬ ፋራሳዊይናቤ ሄሮዶስ ኤናቤ ግዶርካ ኤዲ ክዛራ ቡልዲና።
- 14. ኬኻም ናዴ ክግያ ይንታና ኬያማዶ፡- “አስታማራዮ፤ ያ ጎንዴ ኤዲ ሃዶንም ዎቲህ ዴስዲና፤ ኤናሳ ዎቲም ሃሽዲሞንታኻ ያ ኤዲም ፓሊማም፤ ባሪያሳ ጎይንም ሶጎ ጎንዴና ሃታማርሳይ፤ ኤሳንካ ቁሳርናንቴ ግብር ካሽንቶ ዛግሳም ኮዛግሳይኖ ሞ ዛግሳይ?”
- 15. ኤ ዎቲህ ዎካሻያም ሞ ካሻን ዎጋሬ?” ኮዶን የሱስ ኬ ካይስንም ኤዲ ኬዶን ዴሳንቴ፤ “የቲህ ሃርናንቴ ኢም ጳብንሻናንቴ የዛጌ? ይንዳ ዲናር ካላ እናንቴ ባአማቴ፤ እሽዴና” ኬግያ ክያማዶ።
- 16. ኬኻም ክናንቴ ባአቴ ናእዲና። ኖ ኬግያ “ካ ሃው ዎቲቴ? የራ ዛራን ኡካዳዳ ሃው ጋንታቴ ና?” ክያማዶ። ኬኻም ክግያ “ቁሳር ጋንቲና” ኬያማዶ።
- 17. የሱስካም ቁሳር ጋይናም ቁሳርናንቴ ባሪያ ጋይናም ባሪያናንቴ እምማቴ ና” ኬግያ ክያማዶ። ኬኻም ኪም የርሽዲና።

ኬሞንቤ ዴምጲንባራ ጳጳንቤ

- 18. አጋሳኻም ራስባራ ኤና ጃዳና ዴምጲባራኻ ጳጲማም ሃማንቴ ጌያይና ሰዱቃዊይና ናዴ ይንታ ሃማንቴና ክካላ ኬአይሳዶ፤
- 19. “አስታማራዮ፤ ኤዲ ካላሳ እንዳናሳ ሜ ኬማንቴ ናሶ አዲማ ክጂና፤ ኤያ አጋሳ ሜንም እንዳ ናሳ ኬማንቴ ሜቴ ክሳም ክዎይቤኻናንቴ ሙሴ ዎናንቴ ዋርቃትሮ ኡክዲና።
- 20. ታ ክሳ እንዳ ናና ሦጳና ዳና፤ ናሳ ቶይዳ ሜ ኬማንቴ ይሳ ሜቴም ዎይስማ ጃይዲና፤
- 21. እንዳ ናሳ ላንሣ ኤስንም ኬማንቴ እሺማሳ ሜቴም ዎይስማ ጃይዲና፤ ናሳ ማክንሳኻም ጎያ አጋኻ ጃይዲና፤
- 22. ናና ሦጳና ውል ኤስንም ኬምዲና፤ ኮዶን ኬ ፓይላ ውል ይሳ ሜቴም ዎይሳድማም፤ ቱንሥሮ ኤስኖ ጃይዲና።
- 23. ታ ናንሢ እንዳ ናና ሦጳና ፓይላ ውል ኤስንም ኬ ኬማዶንታኻ ቤሬ ዴምጲሮኻ ይጳጲና ሃው ሜ ኮዴና?” ክግያ ኬያማዶ።
- 24. የሱስካም ይንታ ሃማንቴና ኬናንቴ ክማሳዶ፡- “የቲህ ይንናንቴ የጳንባይኖ ዋርቃትና ጋዛናቤ ባሪያሳ ካንታንቤም የዴስሞንታኻና!
- 25. ኤና ጃዳና ዴምጲንባራ ይጳጲና ጳ ፖላሮን ዳና ባሪያሳ ኤርጎን ኤና ግያና ኬዳይ፤ ኬምማም፤ ኬማዲማም።
- 26. ኮዶን ኤና ጃዳና ዴምጲንባራ ኬጳጳይንም ባሪያ ቃዋሮ ‘እንታ አብራሃም ባሪያ፤ ይሳቅ ባሪያ፤ ያዕቆብ ባሪያና’ ክያማዶን ዋርቃትንሣ ኢሮጎ ሙሴ ክጌያዶን የቲህ ናባባዳዩው?
- 27. ባሪያ ኤና ሳዳንካ ዳና ባርዮና ኤና ጃዳና ባርዮ ትይማም፤ አጋታኻ የቲህ ጌጲ ጳምብዲና።”

- 28. ኤና ሙሴ ዳምብን ኡካይና ግድርካ ኤዲ ካላ ናዴ ኬ ክትምካ ኤሳርዲና፤ የሱስ አይሳ ክካላ አይሳዳዳናንቴ መልስ ልክ ክእማዶንም ኤያ ጳቅሳንቴ ክግያ፤ “ኤሳንካ ዳምብና ጌይዳዳና ግድር ውል ካላ ሳጋ ዳምባ ሃማቴ?” ሃማንቴ አይስዲና።
- 29. የሱስካም ይንታ ሃማንቴ ክናንቴ ማሲዲና፡- “ዳምብና ውል ካላ ሳጋ ዳምባ ካና፤ ‘ያ እስራኤል ኤሳርማ፤ ጌጳ ዎሳ ባሪያ፤ ባርዮ ካላና፤
- 30. ያኻም ባሪያ ሃሳ ጌጳም ሃሳ ዎይላምሮኻ ቡላቴቤ፤ ሃሳ ሳዳንካቤ፤ ሃሳ ቃቦንካቤ፤ ሃሳ ካንታንካቤ ናሽማ።”
- 31. ዳምባ ላንሣኻም ካና፤ ‘ሃሳ ጉልን ኤናም ፓይላ ሃም ሃናሻያግያ ናሽማ።’ ዳምብና ክናሳ አባራ ዳምቢ ሳጊ ቆልማም።”
- 32. ኤያ ሙሴ ዳምብን ኡካያ ክግያ ይንታና ክያማዶ፡- “አስታማራዮ፤ ያ ልኪና ሃጌያዶ፤ ኖ ካላ ሶጎ ክዶንቤ ክሳ አባራ ባርዮ አብ ኮቆልምንቤ ሃጌያዳ አጋ ልኪና ሃጌያዶ።
- 33. ኪም ሃሳ ዎይላምሮኻ ቡላቴቤ፤ ሃሳ ቃቦንካቤ፤ ሃሳ ካንታንካቤኻ ናሻዳይኖ፤ ሃያንቴ ሃሳ ጉልን ኤናም ሃም ሃናሻያግያ ናሻዳይኖ ቆላቤ የራ ባሪያ ናንቴ ኮቃዳይና ፓይላቤ የራ ዋኒ ባሪያናንቴ እንዳይናቤሳ ሳጊና።
- 34. የሱስካም ክናንቴ ኤያ ጎንዴ ክማሳዶን ሼዳንቴ ኤያ ግያ፤ “ያ ባሪያሳ ማንግስትን ካላ ፔጌ ትማም ሃዶና” ክያማዶ። አጋሳ ራስባራ ኤዲ ክካላ አይሶ አይሳናንቴ ዛጋዳ ቆልማም።

ክርስቶስ ሃው ናሶቴ?

- 35. የሱስ ባርዮን አኖንሣ ሻንሮጎ ይታማርሳን ዋዳንካ ይንታ ሃማንቴና አይሶ ክአይሳዶ፤ “ኤና ሙሴ ዳምብን ኡካይና ክርስቶስ ዳዊት ናሶና ሃስ ኬያሜ?
- 36. ዳዊት ይባራንካ ኡስን ጋዛንካ ክሳ ጌይዲ፤ “ጌጳ ጌጳ እሳናንቴ፤ ‘ጋላ ሃሳም ሃሳ ራንሣ ችባራ እሳ ሃያዛራ ያ እሳ ምዛቅባራ ዳርቅማና’ ክያማዶና” ክያማይ።
- 37. ታ ናንሢ ዳዊት ‘ጌጳ እሳ’ ክያማዳና ሃስ ዳዊትሳ ናሶ ክዴ?” ዛርስኖ ጴጥኖኻም ኪም ዋዛኻ ኤሳርቴና ኮዶ።
- 38. ኖ ኬም ይታማርሳን ዋዳንካ ኬግያ ይንታና ክያማዶ፡- “ኤና ሙሴ ዳምብን ኡካይና ካላንካ የም ማንክማቴ፤ አፓላን ጉድጳንም አርሳንቴ ያያና ኬዛጋይ፤ ጋባን ጳልና ግድር ጎብንታ ጌሶና ኬዛጋይ፤
- 39. አይሁድናሳ ምስኮን አኖሮ ቦርኮቶና ሃልና ኬዛጋይ፤ ድግስን ራቅሮ ጎብንታ ራቂና ኬዛጋይ።
- 40. ካይስንሦ ባሪያም ጉዱጵ ምስክቴ ሜና ዳልሶናሳ አኖኒና ኬቡራይ፤ ኬ እግናዛራኻም ዳባምኖ ካዳይኖ ሳጊና።

ኤስን ዳልሶኖ ብራ ኮእማዳ

- 41. የሱስ ይንግድር ብሬን አርሳዳን የርንካ ልኪ ዳርቃንቴ፤ ኤዲ ጴጥ ባርዮን አኖንሣ ብሬን ይንግድር አርሳዳን ሳጥንንዛራ ብሬን ኬአርሳይንም ሼድቴና ክዶ። ኤዲኖ ዎድሞኖ ጴጥ ብሬ ጴጥ አርስዲና።
- 42. ኮዶን ኤዲ ሜ ዳልሶ ኩውፒ ካላ ሳንቲም ካላ ኻላ ሳግምና ናስን ግድርካ አሽካዳዳናም ሳንቲም ላማ ሳጥንሣ ኢሮ አርስዲና።
- 43. የሱስካም ይሳ ታማርና ግስማንቴ ይንታና ክያማዶ፡- “እንታ የናንቴ ጎንዴና እጌያይ፤ ኤስኖ ዳልሶኖ ኩውፒኖ ኮኖ ኤና ውል ካላ ሳጊና ኮእማዶ።
- 44. ኤና ክና ፓይላ ኮይሶን ይሳ ጴጥን ዶሮኻ ቁታና ኬእማዶ፤ ኮዶን ና ኩውፒ ዳአንቴ ይሳ ዳናም ፓይላ ቡላንቴ እኒ ይንካ ይዳንግያንዳናም ፑጭ እምዲና።

ፔንሣ ቱንሥሮ የራ ሃማይና

1. ኖ ባርዮን አኖንባራ ክውታና፤ ክሳ ታማርና ግደርካ ካላ ክግያ፤ “አስታማራዮ፤ ሱንና ሃሞንታ ኬደንቤ፤ አኖኖኸም ሃሞንታ ኅብ ኮደንም ሼድማ ና” ክያማዶ።
2. የሱስካሞ ማሳንቴ ክግያ፤ “አኖና ጌጲ ጌጲና ክናም ሃፓው ሃያፓይ? ሱና ዋ ዋዛራ አጋንታ ይዳዛራ ዳማሞ፤ ፓይላ ውል ኮስማና ኬኮስማይ ና” ክያማዶ።
3. የሱስ ባርዮን አኖንካ የካ ዳብሬ ዘይት ጌማርታዛራ ዳርቃንቴ ክዳኻ፤ ጴጥሮስቤ፤ ያዕቆብቤ፤ የሞንስቤ፤ እንድርስቤ ይንታ ሃማንቴና ክካላ ኬአይሳዶ፡-
4. “ይንዳ ዎናንቴ ጌይማ፤ የራ ክና ፓይላ ሃ ኬያሜ? የራ ክና አኻራ ኬያምማ የራ ሃማያ ሃርቴ?”
5. የሱስ ኬግያ ይንታ ሃማን ካርስዲና፡- “ኤዲ ካላኸም የም ሱዳን ኮጋሬኸናንቴ የም ማንክማቴ፤
6. ኤዲኖ ጴፀኖ ‘እንታ ኖና’ ሃማንቴ እሳ ናብንካ ናአና ኮናአይ፤ ኤዲ ጴጊምካሞ ሱዳና ኬሱዳይ።
7. ባንቆንቤ ባንቆንቤሳ ዴላቅ የኤሳርና የቃሥምናኖ፤ አጎኖኸም ሃምማና ኮያማይ ካላኸም ሸዲማሞ፤ ኮደንካሞ ቱንሥኖ አኻራና።
8. ቶርስኖ ዋ ቶርስን ዋዛራ፤ ማንግስት ዋ ማንግስት ዋዛራ ዳጳና ኮዳጳይ፤ ራቅ ጴፀ ግደር ዚጋንቤ ዳቆቤ ዳና ኮዳይ፤ ጋሎና እግና ፓይላ አኻራ እሢማንሣ ካርሲና።
9. ኮደን የቲህ የናንቴ ፓኸልዲማቴ፤ ኤና የም ኤና ብቶን ታኸይናናንቴ ሳስካንቴ እማና ኬእማይ፤ አይሁድናሳ ምስኮን አኖን ግደር የም ዳና ኬዳይ፤ እሳ ማኚ የዴኸናንቴ እሳ ናብንካ ሃማንቴ ኤና ፔንሣ ጋርናቤ ኤና ፔንሣ ብትናቤሳ ዎትሮ ዎያና የዎያይ።
10. ኮደን ብርሳንቴ ቶርስን ፓይላ ውል ናንቴ ዴላቅን ፃሊንም ኮጌይዴ።
11. የም የዳንቴ ብቶንዛራ ባዳያ ዋዳስካ ሳአታ አጋኸ የናንቴ እንዳይናም ጌይማቴ፤ ሃር ዎጌይ ሃማንቴ ብርሳንቴ የቃብምናኖ፤ ዴላቃይኖ ኡስኖ ጋዛኖና የቲህ ትማሞ።
12. እንዳ ናሳ ይሳ እንዳ ናሳም፤ እንባኸም ይሳ ናሳም ዴሳዴኸናንቴ ሳስካንቴ ኪም እማና ኬእማይ፤ ናናኸም እምባናቤ እንዳናቤናንቴ ኤሳርማሞ፤ ኬምኸም ዴሳና ኬዴሳይ።
13. የቲህ እንካ ሃማንቴ ኤዲ ፓይላ ውልካ ቶዛዳድዳና የዳይ፤ ኮደን ኤያ ቱንሥንዛራ ዋቻዳዳ ዳቃና ክዳቃይ።
14. ‘ካዮን ሲያሞን’ ዎያዲሞን ራቅሮ ዎያንቴ የሼዳያ ዋዳስካ፤ ዋርቃትን ናባባዳ ክዶቅቤ፤ ኤና ይሁዳ ግደር ዳና ጌማራዛራ ኬጎቤ።
15. ኤያ አኖንሣ ዱርሮን ዳኸም ሃንቻን ክጋሬ፤ ኮይና ኢሮን ዳናም ቡላናንቴ ይሳ አኖንዛራ አርዳን ክጋሬ።
16. ኤያ ይሳ ሃምሮን ዳኸም አፓላን ይሳም ቻናንቴ አኖንዛራ ማታን ክጋሬ።
17. ሮሮና እግናኸ ሜና ሲርማናቤ ሜና ናናም ቆአሻይናቤናንቴ ሃይ!
18. ጋሎኖ አጎኖኸም ባርግን ዋዳንካ ዳአን ኮጋሬኸናንቴ ምስክማቴ።
19. ቤሬ አጎኸ አና ብራንቴ ባሪያ ፔን ክዎዳዳኸ ካርስንቴ ካ ዎዳዛራ ሃያንቴ ቤሬ ብራዛራኸም ይንካን የክንሣዲማን ቆልማ ጋሎ ጌጲና ኮዳይ።
20. ጌጳ እኒ ሮሮናም ክዴሳድምና እኒ ኤዲ ካላኸም ዳቅማሞ፤ ኮደን ኤና ካማዳዳና ኖ ይናንቴ ይካማዳናናንቴ ሃማንቴ ኖ ሮሮናም ዪድስዲና።
21. ዋዳ አጋኸ ኤዲ ካላኸም የግያ ‘ክርስቶስ ኮታሪና ክዶ’ ዎይካሞ ‘አጎታሪና ክዶ’ ክያምና የአምኒናኖ።
22. ፖጋሞን ኤና ክርስቶሲናቤ ፖጋሞን ኤና ባሪያሳ አፖን ጌያይናናቤ ዳጳንቴ፤ የራ ሃሚማን ግያንዳናምቤ የራ ሃሊናቤም አሸካንቴ ኬ ይቻላያዳና ኤና ካማዳዳናም ካውል ሱዳና ኬሱዳይ።
23. አጋታኸ ፓኸላ ዳማቴ፤ አኻራ ዋዳኖ ኮየስክማ እንታ የናንቴ ጌይዲና።
24. ቤሬ ዋዳ አጋኸ ጋሎን አጎሳ ራስባራ ሓዮኖ ፅፓና ኮፅፓይ፤ አርፒኖኸም ሮጲማሞ፤
25. ኤዚናኸም ፖላንባራኸ ቲርካና ኬቲርካይ፤ ፖላንሣ ካንታናኸም ዋጃና ኬዋጃይ።
26. ዋዳ አጋኸ ኤዲ ናሶ ካንታ ጌጲካቤ፤ ጎሺንቤኸ ማታንቴ ሉፒንካ ክናአይንም ሃፓና ኬያፓይ።

27. ኖ ይሳ ኤርጎን ኤናም ንእሳንቴ፤ ፔንሣ ማራና አይድና ባራንካ፤ ፔንሣ ማራሮኻ ካርሳንቴ ፖላንሣ ማራንዛራ ኤና ክናንቴ ካንዳዳናም ፑኡሻና ኬፑኡሻይ።
28. ዳይንሣም ባላስን ሃቃስ ካላ ታማርማቴ፤ አንትና ጫጋን ኬካርስናቤ፤ ቃልጶና ኮዳን ኬካርስና ባርግኖ ኮየስካዶንም የቲህ ዴሳና የዴሳይ፤
29. ሃያንቴ የራ እግና ሃምማን ኬካርሳዶን የያፒና፤ ክሳ ናእንቶኖ ኮየስካዶንቤ ኖ የሳ ሻንን ካላ ክሳናዶንም ዴስማቴ።
30. እንታ የናንቴ ጎንዴና እጌያይ፤ የራ እግናሳ ሃምማዛራ ሃርያኖ ኮኖ ሳግማግግ፤
31. ፖላንቤ ፔንቤ ሳጋና ኬሳጋይ፤ ኮዶን ዴላቅኖ እሳ ሳግማግግ።

ሮራቤ ሳኦታቤሳ ናእንቶንም ዴሳዲማግግ

32. ኮዶንካግ ሮራ አጋም ወይካግ ሳታ አጋም ባሪያ ወምባሳ አባራ ጳ ፖላሮን ዳና ኤርጎን ኤና ወይ ናሳ ዳናኻግግ ኤዲ ካላኻግግ ዴስማግግ።
33. አጋታኻ ዋዳስ ሃ ክናአይንም የዴስሞንታኻ፤ የም ማንክማቴ፤ ዋቻዳንቴኻግግ ምስክማቴ።
34. አጋኻግ አኖን ይሳም ካይስናናንቴ ጋራንቴ፤ ካይስናምኻግግ ኬሳ ዋድማናዛራ አርሳንቴ፤ ዳቅማን ኤያ ዋቻዳንቴ ክዳቃኔኻናንቴ ኤልቅማንቴ ያአዳ ኤዲና ክታኻይ።
35. ታ ናንሢ ኤያ አኖን እምባ እባንን ወይካግ ግዶጋልት ወይካግ ባቻና ኬኤሊካ ወይካግ ፔንሣ ሶፅም አፖ ክናአይንም የዴስሞንታኻ ዋቻዳንቴ ዳቃንማቴ፤
36. የዴስማ ናዴ ራታንቴ የዳኻ የም ሃፓን ክጋሬ!
37. የናንቴ የራ እጌያዳናም ኤና ፓይላ ውልናንቴ ጌያና እጌያይ፡- ዋቻዳንቴ ካልማቴ!”

ኤስኖ የሱስም ዋኦቲንካ ቃዳዶኖ

ማርቆስ 14

1. ፋስካንቤ ባላሻንቤ ባዓላ የስካናንቴ ሮሮ ላማ ኮሽዳና ካህንናሳ ኤና ጋርናቤ ኤና ሙሴ ዳምብን ኡካይናቤ ጋሮኻ የሱስም የዳንቴ ጎይ ይንካ ኪም ይዴሳያ ዛግቴና ኬዶ።
2. ሃያንቴኻግግ “ዛርስኖ ወዛራ ዴላቅ ዛርቦ ዳሳን ኮጋሬኻናንቴ ባዓል ሮሮ ዳን ኮጋሬ” ሃምቴና ክጊያ ኬዶ።
3. ኖ ቢታንያ ግዶር ሙልካንባን ኤያ ስምኦን ሃንዳያ አኖሮጎ ዳርቃንቴ እስምቴ ክዳኻ፤ ሜ ካላ ሻንንሣ ዋቸን ናርዶስ ሃማንቴን ግስንዳን ዋኦቲን ጫንቃላማ አልባስጥሮስ ቃርምሽካ ባአንቴ ናእዲና፤ ና ቃርምሻም ዴሳንቴ ክሳ ሜቴር ዋኦቲን ይንቅስዲና።
4. ኤና አጎታር ዳናሳ ዋኒ የራኻ ዳጋሳንቴ ክጊያ ይንታ ሃምቴና ኬዶ፡- “ዋኦቲንም ሱን ሃርናንቴ ካይሳዴ?”
5. ዲናር ማቶ ማካንሣ ጳባራ ሻንሻንቴ ብሬናም ኤና ኩፕናናንቴ እኒ እማናንቴ ቻላና ቻልዳይ ሃማንቴ ኤስንም ኬ ጂቢዲና።
6. ኮዶን የሱስ ይንታና ኬግያ ክያማዶ፡- “ኮም ጋርማቴ፤ ሃርናንቴ ኮም የጋልንሺ? ና የር ዓል እናንቴ ሃይዲና።
7. ኤና ኩፕና ሮሮ ውል የላማና ኬዳይ፤ ሮራ የዛጋያኻ ኬም ኬልሻናንቴ ቻላና የቻላይ፤ ኮዶን እንታ ሮሮ ውል የላማ ክንካ ዳማግግ።
8. ና እናንቴ ሃያናንቴ ይቻልዳግያ ሃይዲና፤ እሳ ዱክንናንቴ ኮዴኻናንቴ ብርሳንቴ ና ኢም ቃዲዲና።
9. እንታ የናንቴ ጎንዴና እጌያይ፤ ዴላቅን ዓሊን ኮም ፔን ጋላፕንሣ ራቅና ይንግዶር ጌይዳይና ውል ግዶር የራ ኮያያዳም ይንካ ኮም ዶቅሳንቴ ኮሳ የር ጌያና ጌይዳይ።”
10. አጋሳ ራስባራ ታማርና ክሳ ታጲ ላማና ግዶር ካላ አስቆሮቱ ፔን ጋንታ ይሁዳ ኪም ሳስካንቴ እማናንቴ ኤና ካህንናሳ ጋርናዛራ ያእዲና።

11. ኬኸሞ እግናም ይኤሳራና ዋዝንዲዲና፤ ክናንቴ ብሬ እማናንቴ ናሽዲና፤ አጋታኸ ኪም ይንካ ሳስካንቴ ይእማዎ ዋዳ ልኪ ሃማ ዛግቴና ክዶ።

ጌዳሳ እባንን ዳአንኖ

12. እያታ ፋስካን ጋንታም ይንካ ማቻዳዎ ባላሻን ባዓላሳ ሮራ ካርሳ ጋላ ታማርና ክሳኸሞ ክካላ ናዴ ክግያ፤ “ፋስካንህ እባንን ዳአኖን ሃናንቴ ሃንታር ዎአሽኬኸናንቴ ሃዛጌ ና?” ኬያማዶ።

13. ኖኸሞ ታማርና ይሳ ላማም ይንታ ሃማንቴና ክይእሳዶ፡- “ካታማንዛራ ይማቴ፤ ኤዲ ዳንካ ኑንቆን ባስክሳዳ የላማ ኬራና ክኬራይ፤

14. እና ይዛራ ክአርዳዳዛራ ኪም ጫግማቴ፤ ኤያ አኖንህ እምባግያ፤ ‘አስታማራ፤ “እሳ ታማርና ላማ ፋስካንህ እባን ዳአኖንም ይንግዶር እህያ ቸችና ይዎድማዎ ራቃ ሃማቴ?” ሃምዲና ሃምማቴ፤

15. ኖ አኖንህ እና ጳባራን ዳ ግዶር ራቅ ዎርሪ ዴዴ ይንግዶር አፓዶኸ ይዳ የናንቴ ዳዋና ክዳዋይ፤ አጋር ዎናንቴ አሽክማቴ።”

16. ታማርና ክሳኸሞ ዉታንቴ ካታማንዛራ ያእዲና፤ የራ ፓይላ ውል የሱስ ክጌያዳግያ ሃምማንቴ ኬዳኸ ኬ ሃፕዲና፤ ፋስካን ዳአኖንም አሽክዲና።

17. ኮእባናና የሱስ ታማርና ይሳ ታዲ ላማና ላማ ክንካ ናእዲና።

18. እሥማናንቴ ዳርቃንቴ ኬዳኸ፤ ኖ ኬግያ “እንታ የናንቴ ጎንዴና እጌያይ፤ የሳ ባክሮ ካላ እላማ ክንካ እሥማያ አጋ ኪም ሳስካንቴ እማና ክእማይና” ክያማዶ።

19. ኬኸሞ እልል ጃይዲና፤ ኬ ፓይላ ካላ ካላኸ ክግያ “ኬዳ እንታው እዳይ?” ሃማን ካርስዲና።

20. ኖ ኬግያ ይንታና ክያማዶ፡- “ታዲ ላማና ግዶር ካላ እላማ ክንካ ሻርቃንሳ ኢሮ አንን አርሳያ አጋ ኖና።

21. ኤዲ ናሶ ዋርቃትሮ ክሳ ኡካዳዳግያ ያእና ክያአይ፤ ኮዶን ኤያ ኤዲ ናሶም ሳስካንቴ እማያ አጋናንቴ ሃይ! ኤያ አጋም እኒ አዳድድምና ክናንቴ ባሺና ኮዳይ።”

22. ኬእሥምካኸሞ ባላሻንም ቻንቴ ፑጋንቴ ቁንፃንቴ ታማርና ይሳናንቴ እማንቴ፤ “ችማቴ፤ ኮኖ እሳ ዋኖና” ኬግያ ክያማዶ።

23. ሻርቃንካሞ ዳሳንቴ ፑጋንቴ ኬናንቴ እምዲና፤ ኬ ፓይላ ውል ኮግዶርካ ውጭዲና።

24. ሃያንቴ ኬግያ ይንታና ክያማዶ፡- “ኮኖ ኤዲ ውል ናንቴ ይንቅማይኖ ቃሽን ማአስኖ እሳና፤

25. እንታ የናንቴ ጎንዴና እጌያይ፤ ባሪያሳ ማንግስትሮ ዎይንን አፕን ሃሊን እውጫያ ሮራሳ የስካዛራ፤ ናንሢ ካሳ ራስባራ እንታ ኮታርካ ውጭማሞ።”

26. ዋርሳ ዳሳንቴ ቱንሥሮ ዳብሬ ዘይት ጌማርታዛራ ኬ ዉቲዲና።

ጴጥሮስ እንታ ኪም ጴስማሞ ሃንቴ ክዜርማንም የሱስ ብርሳንቴ ጌይድና

27. የሱስ ኬግያ ይንታና ክያማዶ፤ ይንታ ሃማንቴ ዋርቃትሮጎ ኡካዳዳግያ የቲህ ፓይላ እግያ ዎትይ ኪም ዴስማሞ ሃንቴ ዜርማና የዜርማይ፤ ግሽሞን ኤም ዳና እዳይ እያናካሞ ላልማና ኬላልማይ።”

28. ኮዶን እዳዲና ዬም ብራንቴ ገሊላዛራ ያእና እያአይ።”

29. ጴጥሮስካሞ ኤና ፓይላ ሃም ጋራንቴ ኬላልማዳናኸሞ እንታ ሃም ጋራንቴ ይማሞና ክያማዶ።

30. የሱስካሞ ጎንዴና ሃናንቴ እጌያይ ሶታ ካካ አካራ ባቻና እይ ላማ ኬኤልማ እይ ማካም እንታ ኪም ዴስማሞ ሃማንቴ ዜርማና ሃዜርማይና ክግያ ክያማዶ።

31. ጴጥሮስካሞ ሃላማ ክንካ ጃዳዳዳናካሞ ካላካሞ እንታ ሃም ካላኸሞ ጋራንቴ ይማሞ ሃማንቴ ጌይዲና ታማርና ዋንካሞ ፓይላ አጎንታ ሃምድና።

የሱስ ጌቴሴማኒ ግዶር ምስክድና

- 32. አጋሳ ራስባራ ራቃ ጌቴሴማሰኒያ ሃንዳያዛራና ኬያአዶ፤ የሱስካም ይሳ ታማርና ግያ እንታ ቃልቴ እምስኬ የቲህ ኮታር ዳርቅማቴና ኬግያ ክያማዶ።
- 33. ጴጥሮስቤ፤ ያዕቆብቤ፤ የዋንስቤም ይንካ አንሳንቴ ያእድና፤ ካሎን እልል ጃንቴ ቃብማን ካርስድና።
- 34. ሃያንቴ እሳ ሳዳኖ እሳ ጃዛራ ካሎን እልል ጃይድና፤ የቲህ ካሮ ዋቻዳንቴ ካልማቴና ኬግያ ክያማዶ።
- 35. ሾል ያአግያ ሃያንቴ ኮቻሊማያዳና ዋዳስ አጋ ክካላ ክሳጌኻ ናንቴ ምስካንቴ፤
- 36. አባ አባዮ የር ፓይላ ውል ሃናንቴ ኮቻሊማንታኻ፤ ጋላካም እካላንካ ፔግንስማ፤ ኮዶንካም እንታ እቃባዳግያ ዳን ኮጋሬ ሃያ ሃቃባዳግያ ኮዴና ክያማዶ።
- 37. ማታቴ ክንና ታማርና ክሳ ፓይላ ዎዳንቴ ኬዳኝና ክያፓዶ፤ ጴጥሮስ ግያኻም ይንታና ክያማዶ፤ ስምአን ያዎዲድው? ሳአት ካላ ናንቴ ኬኬራዳያ ሃም ባሺድው?
- 38. ጋሎንዛራ አርዳን ጋራናንቴ ዋቻዳማቴ ምስክማቴ፤ ኡስኖ ሼኪምና ኮዶን ዋኖ ዎሳ ካንታ ቃጃና።
- 39. ፕርካም ቃልቴ ምስካ እን ብራን ይምስካዳም ማሳንቴ ምስክድና።
- 40. ፕርካም ማታቴ ክንና አፕ ኬሳ ኮግይዳኝ ዎዳንቴ ኬዳኝና ክያፓዶ፤ የራ ክናንቴ ማስቴይዳናም ኬ ዴስማም።
- 41. እያ ማክንሳም ናዴ ይንታና ኬግያ ክያማዶ፤ ታካም ዎዳንቴ የኡኩንሳዳዘራው የዶ? የክድና! ዋዳናኖ የስክድና ኤዲ ናሶም ሴሶን ኤናሳ አንሮ ሳስካንቴ እማና እንዳይ።
- 42. ዳዲማቴ ዎኤ እም ሳስካንቴ እማያ ናእድና።

የሱስም የዳዲዲና

- 43. አጋዛራ ሃሳውቴ ክዳኝ ታማርና ክሳ ታዲ ላማና ግዶር ካላ አስቆቴ ፔንጋታ ይሁዳ ናእድና፤ ክላማካም ክንካ ሃልፓንቤ ቁራንቤ የዳንቴን ዳና ካይናሳ ኤና ጋርናቤ ኤና ሙሴ ዳንብን ታማርሳይናቤ ዛርስናሳ ዞንዛና ካላንካ ንእሳዳዳ ኤዲ ዱፅና ዶና።
- 44. ሳስካንቴ እማያካም እንታ እሱንቃያ አጋ ኖና ኪም የዳንቴ ባሊ አንስማቴ ሃማንቴ ብርሳንቴ ኬናንቴ ጌይድና።
- 45. ይየስካናካም አጋዛራ የሱስዛራ ናዴ፤ አስታማራዮ ሃማንቴ ኪም ሱንቅድና፤
- 46. ኤናካም የሱስም የዳንቴ ዳክድና።
- 47. ክካላ ኤና ዎያንቴ ዳና ግዶር ካላ ሃልፓን ጉቻንቴ ካይናሳ ኤና ጋራሳ ካይስታሳ ቃምን ታክድና።
- 48. የሱስ ኬግያ ይንታና ክያማዶ፤ ቃው ኤዲ የዳያግያ ብላ ባቻንቤ ቁራንቤም ባአንቴ እም የዶታው የናአዶ?
- 49. ሮሮ ውል ባርዮን አኖንሳ እሮ ታማርስቴ የላማ ክንካ እዶን የቲህ እም የዳድም፤ ዋርቃትሮ የራ ኡካዳዳና ኬያሜኻ ናንቴ ኮኖ ፓይላ ውል ሃምድና።
- 50. ዋዳስ አጋኻ ፓይላ ውል ኪም ጋራንቴ ላልምድና።
- 51. ይም ክጫናንቴ ጫርቄ ሾልጮ ዳክዳንቴን ዳ ናሶ ባርሻ ካላ የሱስም ጫግቴና ክዶ። ኤናካም ናሳ ባርሻ አጋም ኬየዳና፤
- 52. ጨርቃ ይዳክዳዳም ዳባንቴ ፑርድንቆ ኅብቴ ያእድና።

የሱስ ኤና ብቶን ታካይናሳ ዎትሮ

- 53. የሱስም ካይናሳ ኤያ ጋርናዛራና ኬንሳዶ፤ አታር ካይናሳ ኤና ጋርናቤ ዞንዛናቤ፤ ኤና ሙሴ ዳምብን ታማርሳይናቤ ፓይላ ፑጭድና።
- 54. ጴጥሮስ ፔጌካ ጫጋዳቴ ኤያ ካይናሳ ጋራ ሞሮንዛራ አርዳንቴ አጎታር ኤያ ካይናሳ ጋራሳ ካይስና ላማ ኖን ሾሊንዳቴና ክዶ።
- 55. ካይናሳ ኤና ጋርናቤ ኤና ብቶን ታካይናቤ የሱስም ዴሳናንቴ ኤዲ ክዛራ ማኛም ዎያያና ኬዛጋዶ፤ ኮዶንካም ኤዲ ማኝ ሃፓናንቴ ኬ ቻሊድማም።
- 56. ኤዲ ዱፅ ክዘራ ማኛምን ኬዎያዶንካም አፖ ኬሳ ኪም ጋአድማም።

- 57. ኤና ዋን ይንታ ሃማንቴና ፖጋሞኻ ክዛራ ኬታርጃዶ፤
- 58. ኤያ ካሃ ኤዲ አንካ ባሪያ ኦኖን አሽካዳዶንም ኮሳንቴ ሮሮ ማካንሳ እር ኤዲሳ አንካ አሽካዳዶማ ኦኖ አብ ወይሳና እዎይሳይና ሃማንቴ ክጌያዶን ዎትይ ኤሳርዲና።”
- 59. ኦጎንታ ሃንዶኳ ታኻሞ አፖ ኬሳ ኪም ጋአድማሞ።
- 60. ካይናሳ ኤያ ጋራ ዳደንቴ ክሳ ዎትሮ ዎያንቴ፤ ኤናሳ ሃዛራ ታርጃዳይኖ ኮኖ ሃርቴ? ሃርቴ ኬናንቴ አፖ ሃማንቴሞኖ? ሃማንቴ የሱስ ካላ አይሰድና።
- 61. ኮዶን የሱስ ታካሞ ጫክ ሃማንቴና ክዶ፤ ካላካሞ አፖ ኬዛራ ማሳድማሞ፤ ኤያ ካይናሳ ጋራ ፕርካሞ ጌዳ ናሳ ክርስቶስ ያው? ሃማንቴና ክአሳዶ።
- 62. የሱስካሞ ይኒ እንታና፤ ኤዲ ናሶ ብታሳ ምዛራቅባራ ዳርቃቴ፤ ፖላንሳ ሉፒንካኻሞ ክናአይንም ሃፓና የያፓይና ክያማዶ።
- 63. ኤያ ካይናሳ ጋራካሞ አፓላን ይሳም ሃአሳንቴ ይንታ ክያማዶ፤ ካሳ አባራ ማኛሞ ሃሳማ ዎዛጌ?
- 64. እርሞና ክሳም የቲህ ኤሳርድና፤ ታ የካላ ናንስ ሃር ኮታኬ? ፤ ኬካሞ ዴሳዴ ሃማንቴ አፖ ካላኻ ክዛራ ብቶን ታክድና።
- 65. ዋዳ አጋኻ ኤና ዋን ክዛራ ፓፅን ማማን ካርስድና፤ አፕ ክሳም ክጫንቴ ኪም ዶቅቴ ይንዳ ሃም ዳዳ ሃውቴ ዎናንቴ ጌይማ! ሃሚቴና ኬዶ። ካይስናኻሞ ኪም ጫአዳቴ አንስድና።

ጴጥሮስ የሱስም እንታ ጴስማሞ ሃምድና

- 66. ጴጥሮስ ግብንሳ ቸባራባራ ክዳኳ ኤያ ካይናሳ ጋራሳ ሜና ካይስና ግዶር ካላ ክዛራ ናእድና፤
- 67. ጴጥሮስ ኖን ካሾልዲካ ሃፓንቴ ኪም ላይ ሼዳንቴ ያኻሞ ናዝሬት ግዶር የሱስ ላማ ክንካና ሃዶና ኮያማዶ።
- 68. ኮዶን ኖ ሃጌያን ኦጎም እንታ ጴስማሞ እናንቴ አርድማሞካሞ ሃማንቴ ዜርምድና፤ ሃያንቴ ሙዳፖን አርደንዛራ ያእድና ዋዳን ኦጎካ ባቻና ኤልድና።
- 69. ካይስቶኖካሞ ኤና ኦጎታር ዎያንቴ ዳናግያ ኤያ ካኻሞ ኬግዶር ካላ ሃማንቴ ፕርካሞ ጌይድና።
- 70. ኮዶን ፕርካሞ ኖ ዜርምድና። ዋዳ ቶካሳካሞ ራስባራ ኤና ኦጎታር ዎያንቴን ዳና ጴጥሮስ ግያ ገሊላ ኤዲ ሃዶንታኻ ያሃካሞ ኬሳ ካላና ኬያማዶ።
- 71. ኮዶን ኖ ኤያ የጌያያ አጋም እንታ ጴስማሞ ሃማንቴ አሺንሻንቴ ኪም አሻንካሞ ካርስድና።
- 72. አጋዛራ ባቻ እያ ላንሳም ኤልድና፤ ጴጥሮስካሞ አካራ ባቻ ኬኤልማ እይ ማካም እንታ ኪም ጴስማሞ ሃማንቴ ዜርማና ሃዜርማይ ሃማንቴ የሱስሳ አፖ ጌያዳዳ ክናንቴ ዶቅ ሃምድና። ሃያንቴ ጌዲ ኤፍድና።

የሱስ ጲላጦስሳ ዎትሮ

ማርቆስ 15

- 1. ቡር ዋዳ ካይናሳ ኤና ጋርናቤ ዞንዛናቤ ኤና ሙሴ ዳምብን ታማርሳይናቤ አይሁድናሳ ኤና ብቶን ታካይናቤ ፓይላ ክንካ ሃሳሞንቴ የሱስም ዳኻንቴ አንሳቴ ቃልቴ ጲላጦስ ናንቴ ሳስካንቴ እንዲድና።
- 2. ጲላጦስካሞ ያ አይሁድናሳ ብታው? ሃማንቴ አይስድና፤ የሱስካሞ ያ ጌይድና፤ ሃማንቴ ክናንቴ ማስድና።
- 3. ካይናሳ ኤና ጋርናካሞ የር ዱፅካ ኪም ቤርንስድና።
- 4. ጲላጦስካሞ ሃርቴ ይናንቴ አፖ ሃማንቴሞኖ? ኤና ሃም የር ዱፅካ ቤርንስቴና ኬዶ ሃማንቴ ፕርካሞ አይስድና።
- 5. ኮዶን የሱስ አፖ ካላካሞ ማሳድማሞ ጲላጦስ ናንቴ የር ዋና ማትድና።
- 6. በዓልን ዋዳንካ ዛርስንሳ ኬናንቴ ቡልዴኻ ናንቴ ዳክን ኤያ ኬዛጋያ ቡልዳያ ዳምብ ኬሳ ዳይድና።
- 7. ዋጭንካ ሃማንቴ ኤና ኤዲን ዴሳዳ ጋሮን ኤና ላማካሞ ክንካን ዳካዳዳ ባርባን ሃማንቴን ግስንዳያ ኤዲ ካላ ዳይድና።
- 8. ዛርስኖ ናዴ ሌሌ ዳዳዳግያ ኬናንቴ ሃይዴኻናንቴ ጲላጦስም ምስክድና።
- 9. ጲላጦስኻሞ አይሁድናሳ ብታም የናንቴ እቡሌኻናንቴ ዛጋው የዛጋይ? ሃማንቴ ኬካላ አይስድና።

10. አጎኖካሞ ካይናሳ ኤና ጋርና የሱስም ይናንቴ ሳስካንቴ ኬእማዶኖ ጋሮ ኮዶንም ይደሰደንታኻና።
11. ኮዶን ኤና ካይናሳ ጋርና ራቃ ክንታሮጎ ባርባንም ኬናንቴ ቡጵካናንቴ ዛርስን ላማ ክንካ ሞላውዲና።
12. ጲላጦስ ፕርካሞ ታ ናንስ አይሁድናሳ ብታ ሃማንቴ የጌያያም ሃስ እያዩኻ ናንቴ የዛጌና? ኬግያ ክያማዶ።
13. ኬ ፍርካሞ ዝቲማ ሃማንቴ እላቲድና።
14. ጲላጦስካሞ ሃርናንቴ? ሃርቴ የራ ዛርባ ክሴሳዳና ኬግያ ክያማዶ። ኮዶን ኬ ካሎን ዝቲማ ሃማንቴ እላቲድና።
15. ጲላጦስካሞ ዛርስንም ዋዝንሳናንቴ ባርባንም ኬናንቴ ቡልድና፤ ኮዶን የሱስም ዳይሳንቴ ዝታዴኻንቴ ሳስካንቴ እምድና።

ዎታዳርና የሱስም አልንስድና

16. ዎታዳርና ኘራይቶሪዮን ሃንዳያ ራቃዛራ ኤያ ፔንሳ ብታ ሞሮንዛራ ኪም አንስድና፤ ሳራውትናም ፓይላ ራቅ ካላዛራ ኬፑእሻዶ።
17. አፓላን ዛዎን ኪም አርስሳንቴ ኡኩምን ጋሊግያ ቁራንቴ ክሳ ሜቴሮና ኬያዶ።
18. ሃያንቴ አይሁድናሳ ብታ ዓልኖ ሃንቴ ኮዴ!” ሃንቴ ኬ ኪም ጌስዲና።
19. ኬ ሜቴ ክሳም ቴሌኻ ዳይዲና ፓፅንካሞ ክዛራ ማማዲድና፤ ኮንፓርሳንቴ ኬ ክናንቴ ጉንስንዲድና።
20. ኪምካሞ አሊንሳንቴ ራስባራ አፓላን ዛዎን ክዛራዶን ቻንቴ አፓላን ክኖንም ኪም አርስሳዲድና፤ ኪም ዝታናንቴኻሞ አንሳዲድና።

የሱስም ዝታዳኖ

21. አሌክሳንድሮስቤ ሩፎስቤ እንባ ስምኦን ሃንዳያ ቀሬና ፔን ኤዲ ካላ ገጠርን ባራ ክንካ መስቀልንም ክቤኤኻናንቴ ኪም ኬ እሽክንሲድና።
22. ሃንቴ የሱስም ራቃ ዎካልሳ ሜቴን ጉሳ ሃንቴን ግስንዳያ ጎልጎታዛራና ኬአንሳዶ።
23. ክርቤን ላማ ዎርሳዳዶን ሃቃስ ወይና ዝአንም ኬ ክናንቴ እንዲድና፤ ኮዶን ኖ ውጫዲማሞ።
24. ሃያንቴ ኪም ዝታዲድና፤ ኬዛራ የስካያ ኮዶንም ዴሳናንቴ ቡክና ኬዳባዶ አፓላን ክሳም ኬ ኪም ካሺዲና።
25. ኪም ኬዝታን ዋዳኖ አካራ ቡርንሳ ሳዓት ማካንቤ ግዶርና ኮዶ።
26. ዋርቃታ ኪም ይንካ ቤርንሳዳ አይሁድናሳ ብታ ሃማያና።
27. ክላማ ክንካ ኤዲ ድብ ላማም ካላም ክሳ ምዛቅባራ ዋም ክሳ ዋርካታባራ ሃያንቴ ዝታዲድና።
28. አና ዋርቃትናሳ ኤና ጋሮን ኤናላማ ኪም ፓይዳዲድና ሃንዳዶኖ ጎያ አጋኻ ሃምድና።
29. ኤና ጎይንካ ሳጋይናካሞ ሜቴ ይሳም ጁግቴ እርሞ ዱፅ ኪም እራንቴ ይንታካሞና ሃምቴ ኬዶ፤ ሃያ ሃፓዳይ! ባርዮን ኦኖንም ኮሳንቴ ሮሮ ማካንሳ እሮጎ አሽካያ ያና፤
30. ይንዳ ናንስ መስቀልን ባራን ሃንቻንቴ ሃም ዳአሽማ።”
31. ሃያንቴ ካይናሳ ኤና ጋርናቤ ኤና ሙሴ ዳንብን ታማርሳይናቤ ኪም ቦዋንቴ ክግያ ይንታና ኬያማዶ፤ ኤና ዋንም ዳአሽድና፤ ኮዶን ይም ዳአሻናንቴ ቻላዲማሞ።
32. ዎትይኻሞ ሃም ዎአምኔካናንቴ ካ ክርስቶስ ያካ እስራኤልና ብታ ይንዳ መስቀልሮካ ክያንቴ። ኤና ክላማ ዝታዳዳናካሞ ይንታ እርሞ ዱፅካ ኪም እርቴና ኬዶ።

የሱስሳ ዴንዲኖ

33. ሳዓታ ላኻ ካርሳንቴ ሳዓታ ሳልዛራ ፔ ሁል ግዶር ፅፓ ማትድና።
34. ሳዓታ ሳል ኮማታና የሱስ ኤሎሄ፤ ኤሎሄ፤ ላማ ሰባቂታኔ?” ሃማንቴ ናቅስ ይሳም ዴግ ሃንቴ እላትድና፤ ዎካልና ክሳካሞ ጌዳዮ ጌዳዮ ሃርናንቴ እም ሃጋራዴና ሃንፓዶ።
35. ኤና ኦጎታ ዎያንቴን ዳና ግዶር ዋን እግናም ይኤሳራና ኤልያስምና ክግስማይና ኬያማዶ።

- 36. ሃያንቴ ኤዲ ካላ ይርካ ቃልቴ ወይንን ዝኣን ጋኣዶን ፕራኻ ሃያንቴ ክውጩ ካናንቴ የሱስ ናንቴ እምድና፤ ሃያንቴ ይንዳ ጋርማቴ ኤልስ ናዴ ኪም ክያንቸሻም ወያሬና ክያማዶ።
- 37. የሱስካም ናቅስ ይሳም ደግ ሃያንቴ እላታንቴ አጋዛራ ሳዳን ታክዲና።
- 38. ባርዮን ኦኖንሳ አፓላኖ ጋዳን ዳኻዳዶ ዳኻ ቻንቴ ላይ ችሆ ቱንስንዛራ ራቅ ላማ ኪም ካሺዲና።
- 39. የሱስካ ልክ ወያንቴን ዳ ፖሊስናሳ ማቶናሳ ኤያ ጋራ ኦንታ እላታንቴ ሳዳን ክታኻዶን ይያፓና ኤያ ካሃ ጎንዴንባ ባሪያ ናሳና ክያማዶ።
- 40. ዋዳን አጋኻ ሜና ፔጌ ወያንቴ ሼድቴና ኬዶ፤ ኪሳካም ባክሮጎ መግዳላዊት ፔን ጋይኖ ማርያምቤ ያዕቆብ ሾላቤ ዮሳ እንዳን ማርያምቤ ሃንቴ ሰሎሜኻም ኬላማ ዳይድና።
- 41. ሜና እግና ገሊላ ግዶር ኪም ጫጋይና ክናንቴ ዋድምቴን ዳናቤና፤ ሃያንቴ ክላማ የሩሳሌም ዛራ ሜና ዱፅና ናኦዳና ዋን ዳይድና።

የሱስም ዱካዲዲና

- 42. ፔኖ እባናዳቴ ንቴና ኮዶ ኡኩን ሳን ሮራ ናንቴ ይንካ ሼካዳያ ሮራ የስክድና፤
- 43. ኤና አይሁድናሳ ብቶን ታካይና ግዶር ካላ ባሪያሳ ናእንቶን ዋዳንም ካሊቴንዳ አርማትያስ ፔን ጋንታ ዩሴፍ ወይላም ዋቻዳንቴ ጲላጠስ ካላ ቃልቴ የሱስሳ ዋንም ምስክድና።
- 44. ጲላጠስካም ኦንታ ይርካ ክጃዶን ይኤሳራና የርሽድና፤ ፖሊስናሳ ማቶናሳ ጋራም ግስማንቴ ክጃኻ ሳዳት ሜም ኮዬስካዶንም አይስድና፤
- 45. ክጃዶንም ፖሊና ማቶናሳ ጋራኻላ ኤሳራንቴ ዋን ክሳም ዩሴፍ ናንቴ እምድና።
- 46. ዩሴፍካም ዋን ክሳም ሃንቺሻንቴ አፓላንካ ሳራንቴ ላይታሮካ ዱክን ኦሎን ኮይዳዶንሳ እሮጎ ዱክድና፤ ኦሎንሳ አፖንኻም ሱንካ ሹፑድና።
- 47. ማግዳላዊት ፔን ጋይኖ ማርያምቤ ዮሳ እንዳን ማርያምቤ ሃንታር ዱክቴ ኬዶን ሼድቴና ኬዶ።

ዴንጲሮኻ ዳዲዲና

ማርቆስ 16

- 1. ኡኩንሳን ሮራ ክሲንኻ ራስባራ መግዳላዊት ፔንጋይኖ ማርያምቤ ያዕቆብ አንዳን ማርያምቤ ሰሎሜቤ ቃልቴ የሱስሳ ብሽንም ቃዳናንቴ ዋኣትና ኬሻናዶ።
- 2. ሳንታሳ ሮራ ካርሳጋላ አካራ ቡር ዋዳ ሓያላ ውታሃ ዱክን ራቅንዛራካም ይቴ ዳንቴ፤
- 3. ዱክንሳ ሙልዳፖሮኻ ሃውቴ ወናንቴ ሱንንም ውንኩርሳያ? ሃማንቴ ክንካ ሃሳውቴና ኬዶ።
- 4. ካቺ ሃማንቴ ኬሼድና ሱንኖ ጌዶኖ ዱክንሳ ሙልዳፖሮኻ ውንኩርሰማንቴ ኮዳኻና ኬያፓዶ።
- 5. ዱክንሳ እንዛራ ኬአርዳ ኤዲ ጋር አፓላ ጫውል አርሳዳ ምዛራቅባራ ዳርቃንቴ ክዳኻ ሃፓንቴ ኬ ቃስምድና።
- 6. ኮዶን ኖ ኬግያ ይንታና ክያማዶ፤ የቃስምናኖ፤ የዛጋያ ዝታዳዳ ናዝሬት ጋንታ የሱስና ኖ ዳዲድና ኮታር ቆልማም ኪም ራቃ ይንግዶር የወዳዳ ካሼ።
- 7. ኮዶንካም ቃልቴ ክሳ ታማርናቤ ጴጥሮስቤ ናንቴ ዩም ብራንቴ ገሊላዛራ ያኣና ክያኣይ፤ የናንቴ ይጌያዳግያ ኦንታር ኪም ፓና የያፓይ ሃማንቴ ኬናንቴ ጌይማቴ።
- 8. ሜናኻም ቃስማንቴ ግባዛዳቴ ዱክን እሮኻ ጎብቴ ውትድና፤ ኩርቲንዳንቴ ይዶንታካ ኤዲ ናንቴ የር ካላኻም ጌያድማም።
- 9. ሳምንታሳ ሮራ ካርሳጋላ ቡርን ዴንዴን ባራ ይዳደዶንሳ ራስባራ፤ ኤስን ይንዛራን ቤሮ ሶዳን ይቡልዶን መግዳላዊት ፔን ጋን ማርያም ናንቴ ብራንቴ ሃፕንዲድና።
- 10. ና ቃልቴ ኤና ኣና ክላማን ዳና ቃብምቴ ኬኤፕካ ሃፓንቴ ኖ ሳዳንካ ክዶንቤ ኪም ይያፓዶቤም ኬናንቴ ጌይዲና።

11. ኮዶን ኬ ኮም አምናድማሞ።
12. አጋሳ ራስባራ ይሳ ታማርናሳ ላማ ናንቴ ጋጣርንዛራ ኬይካ ኤዲ አብግያ ማታንቴ ኬላማ ኬርዲና።
13. ኬ ማታቴ ናዴ እግናም ታማርና ክሳ ዋን ናንቴ ጌይድና፤ ይያማን ታማርና ዋን ኬም አምናድማሞ።
14. ሃያንቴ ታማርና ክሳ ታዲ ካላና ናንቴ ፑጫንቴ እስምቴ ኬዳኻ ሃፕንዲድና፤ ዴንዲንባራ ክዳደዶሳ ራስባራ ኤና ኪም ሃፓዳናሳ የራ ጌይዳዳናም ኬአምድሞንታኻ፤ ኬአምድማኻቤ ኬሳ ዎይላምሳ ዛርሞንኻ ኬዛራ ዋጭምዲና።
15. ይንታካሞና ክግያ ክያማዶ፤ ፔን ጋላፒን ሁልዛራ ይማቴ ወንጌልም ኤና ውል ናንቴ ታማርስማቴ፤
16. ኤያ አምናዳ ኑንቆንካ ሻይዳዳ ዳቃና ክዳቃይ ኮዶን ኤያ አምናድማዛራ ብቶን ታካና ታካዳይ።
17. ኤና አምናዳናም የራ ክና ኬም ጫጋና ኬጫጋይ፤ እሳ ናብንካ ቤሮናም ቡላና ኬቡላይ አፖ ሃልካሞ ደላቃና ኬደላቃይ፤
18. ጉኖንካሞ አንካ ይዳና ኬዱዳይ፤ የር ኤዲም ዴሳያ ኬውጭና ኬዛራ የር ዛርቦ የስክስማሞ፤ አንን ይሳም ኤና ሃጂሞናዛራ ኬዎዲና ኬ ፓሻና ኬፓሻይ።
19. ጌዳ የሱስ ክናም ኬናንቴ ጌያንቴ አጋዛራ ፖላንዛራ ዳዲድና፤ ባሪያሳ ምዛቅባራ ዳርቅድና።
20. ሃያንቴ ታማርና ናዴ ራቅ ሁል ግዶር ታማርስድና፤ ጌዳካሞ ኬንካ አሽክቴና ክዶ፤ ኬሳ ታማርንካ ሃማንቴ የራ ሃምቴን ዳናካ ጌዳሳ አፖኖ ኤና ዛራ አሽክቴና ኮዶ።